

林衣集

四明張氏約園開雕

序

明萬曆間甬上豪於文者屠緯真余僧杲也余讀白榆
由拳農丈人諸集一以詞勝一以法勝卓然推爲東南
大家矣及天崇之際慈谿又有錢仲舉文薦與秦虞卿先
生仲舉詩奇於文先生文奇於詩仲舉靈快不拘拘於
格律而先生雖倚馬萬言未嘗不遺執於法也故陳眉
公表之曰配食由拳農丈人之閒匪其質矣而馮明仲
以爲有緯真有僧杲有仲舉而復有虞卿月旦之評彰
彰於當世者已如此願余於林衣集受而讀之文章固

林衣集序

一四明叢書
一約園刊本

奇矣其考徵鄉獻爲尤足重也當天啓志之修列傳
多出先生筆卽如慈谿袁懋中焯讀史者但譏其爲青
詞宰相誰知其有營救楊博一事乎明史修於清輒爲
清諱雖萬季野史稿亦不敢昌言況王鴻緒輩先生作
邑志袁焯傳時在明季頗詳密傳中直書虜闖入牆子
嶺寇通州楊公博急調發逐之出上怒博不克報公密
疏云不報之罪可原逐虜之功可贖怒遂解又云每爲
時宰言輔臣卽無他善狀令明主有殺諫臣名誰爲貸
斧鉞地下者更言焯入相時前政濁後政驚獨頡頏其

聞皎皎無所遜避云是可辨明史之誣矣惜乎季野未見也余特表而出之以見先生立言之不苟焉攷慈谿藝文志林衣集八卷有文無詩眉道人序中所謂詩草尙扁家櫝是也別有鈔本詩賦具在先生族裔潤卿既出抹雲樓所藏者示余因合兩本編校選爲六卷諸壽序賀序僅存一二而詩與賦則備錄焉余豈敢妄刪先生之文哉蓋酬應之作固知非先生所欲存者也顧如錢仲舉墓志載於慈谿志傳而兩本皆無之益歎可存而未存者多矣先生性孝有德有言文以人重何可聽

林衣集序

三四明徵書
約圖刊本

其溷泯爰梓而序之時民國二十九年一月後學張壽鏞

慈谿志本傳

秦舜昌字虞卿

○秦氏譜號幼澤

以孝聞母常病痞舜昌不解

帶不下樓者浹歲雲閒陳繼儒序而傳之自幼博聞強識

善爲文崇禎閒

○原作萬曆中據雍正志改秦氏譜亦云崇禎改元選貢成均

以貢授

台州府學訓導喜獎進物類士多懷之

○雍正府志○馮若愚撰林衣集

序虞卿幼負異姿自總角卽綜覽百家之言目光炯炯

能辨五色於百步之外夏穴秦山石鼓汲冢聲牙棘齒

者一過輒記經久不忘

林衣集傳

四明叢書
約園刊本

林衣集序

屈大夫離騷本於忠猶孔子春秋本於孝經無德之文
李華以爲詐卓哉乎其言之也四明秦虞卿先生卓犖
冠羣英偉拔世恂恂自將一以淹雅玄勝爲主余嘗讀
其林衣集濃華娟秀精辨澄泓孫吳兵法在律庖丁刀
妙在解其吉人之辭仁人之言哉先生性至孝母氏病
瘠欠伸榻前不褫帶不下樓者經餘年雖有忤意未嘗
見其怒時門生弟子羔雁成羣去爲通人大吏先生不
欲造次投訪藉口遁家爲賓客嚆矢所居嚴重贄文無

林衣集 序

二四明叢書
約園刊本

虛日先生憑几懸筆應之皆駢麗貫串璧合珠聯一似
別有鑪鑪宿具於胸中者稿成掣去散落人閒大小馮
君搜訪採集僅得十之二三而詩草尙扁家積未曾與
文章並懸國門先生嘗拈昌黎句云多情懷酒伴餘事
作詩人詩匪男子第一事惟學謝太傅嘗自課兒耳諸
子文彩映當代試輒冠軍比之荀氏六龍少其一河東
三鳳多其二大要皆先生庭訓陶冶中來也衡泌蕭然
父子吟誦之聲比於鄒魯郡邑干旄士大夫呵殿而過
坊巷者呼爲秦先生而不敢名先生孝似曾閔而兼游

夏之文有德有言當于古人獨行傳求之而配食於由
拳農丈人之閒匪其質矣故眉道人表而出之友弟陳
繼儒撰

林衣集

序

二四明叢書
約園刊本

林衣集序

子鄉蓋有僧杲緯真兩先生云緯真以軼才奇藻橫鶩
一世而僧杲引古法繩之字劇句鉅非西京以上語不
復道世於是知東南有兩作者矣乃余友復有虞卿幼
負異姿自其童牙時卽已備歷五經四部史漢諸子百
家之言無不畢覽眼光炯炯能辨五色百步之外嘗反
黏細書于室壁上與子隔窗隙試之子方瞪目不能舉
一語虞卿輒朗朗讀七行下也夏穴秦山石鼓汲冢聲
牙棘齒難竟誦者余百過未卽解虞卿一過輒能記

林衣集

序

一四明叢書
約園刊本

輒須久不忘余因是益心折之當是時同塾故有錢仲
舉故喜譚古文詞仲舉豪甚每舉觴屬虞卿四明風雅
獨僧杲緯真耳吾才不埒緯真而縱橫有之君其爲僧
杲乎予笑謂仲舉毋涯量我虞卿虞卿何所不有然政
不耐爲今耐爲古耳閒嘗私爲兩君月旦評仲舉才虞
卿法仲舉詩奇于文虞卿文奇於詩仲舉靈快自喜數
幅之後稍不自禁矣虞卿斷斷持格律卽萃律千仞砮
礮萬里未嘗不還軌於法也今仲舉旣應制科以故業舉
其所爲古文詞亦已噪海內獨虞卿尙困頓諸生閒未

卽舉世獨傳其應制時藝所爲古文詞又未卽傳而虞卿雅不好名每有作輒自棄去其存者復多漫滅子故命兒子颺從子仲搜諸逸藁得什之一校梓之使知東南作者有僧泉有緯眞有仲舉復有虞卿也友弟馮若愚書於謾風堂之翠沈閣

林衣集

序

二四明叢書
約園刊本

林衣集目錄

卷一

賦頌贊

登臺賦 有序

滁懷賦 有序

方竹賦 有序

方石賦 有序

鳳覽棠陰頌 有頌

百歲翁劉念庭先生寫真贊 有序

林衣集 目錄

一四明叢書
約園刊本

碑誌

明故馮季君甄甫墓誌銘

明故尹母呂安人墓誌銘

卷二

傳

馮長公傳

別駕蓋庵秦公忠節傳

仲父方伯懷庭公小傳

昆志小傳

袁公煒

周公大昌

楊公孫仲

葉公本

王公萱

秦公金

劉公士逵

劉公志伊

張公學

林衣集

目錄

秦公汝際

錢公維垣

秦公吉

陳公茂禮

闕

劉公廷儀

闕

卷三

序跋

芙蓉館集序

世澤錄序

詩經鼎來序

大小馮君合稿引

白雪草堂師生合稿引

醉鄉小史引

隴西選貢文錄引

卷四

贈序

贈觀察楊公祁陽先生治兵海上序

送司理周使君應召入朝序

林衣集

目錄

三四明鏡書

約園刊本

送邑大夫巴西向侯入覲序

贈郡司農林公署篆慈邑序

賀大觀察洪公亨九先生擢江西副臬序

賀邑侯雲閒李若鶴先生奏績序

賀定邑侯長洲顧巖叟先生考績序

賀郡伯楊公擢巡海兵使序

賀鄞邑侯沈公奏最序

賀參藩楊公以邊功奉詔晉秩序

卷五

雜記 雜著

重復杜白二湖碑記

儒學修衙碑記

舉中丞張公楷憲副張公昂祖孫鄉賢文

舉湖廣方伯馮公叔吉鄉賢文

卷六

詩

苦寒行

塞雁行

林衣集

目錄

四

四明叢書
約園刊本

古別離

人日坐月

馬上見

送無相上人歸越聞其淨廬近若耶溪戲有此贈

喜範明偕令姪至

石榴

桃花

初歲晚眺

獨坐湖亭待酒不至

夏日臧拔翁移樽東湖邀同寅諸友賞荷卽賦

夏閨情

感懷

見雁

雜詩六首

秋夜

花別語

燕別語

覽鏡

林衣集

目錄

五

四明叢書
約園刊本

大隄女

襄陽曲三首

江南曲

閨怨二首

歸雁四首

石上松過僧舍偶題

江干曲

怨歌

讀陳木叔紅樹詩漫題四絕

菊花

林衣集

目錄

六

四明叢書
約園刊本

林衣集卷一

明慈谿秦舜昌虞卿著

賦頌贊

登臺賦 有序 天啟三年

余以壬戌之秋度關而西歷公劉之舊疆隄烏崙涉
白豹稅鞅靈武頗稱壯遊然未獲周覽塞上意未慊
也越二歲又復西征從環夏以東至于長榆客御史
中丞之署署故有臺巋然曠焉四望游目無際千里
龍沙若在宇下自秋徂夏每從登眺覽物興懷匪朝
伊夕雖志靡託于長纓而跡頗同于出塞感而賦之
志所覩聞政繇仲宣荊州之寓亦是士龍鄴宮之旨
爾其詞曰

林衣集

卷一

一四明叢書
約圖刊本

粵呂嬴之拓宇阻河山以爲墉掃白翟之荒裔蒙摩闢
乎榆中於皇聖代隆熙六葉誼遷帥闔牙眊交接抗柏
寺之龐鴻控戎旃而震疊乃構崇臺位當玄武重壁伴
姬章華摹楚用察禳祥雲物斯覩爰始造基取則黃輿
陋一柱之徒巧累十成而非虛爾其鏐戶雙闢左城紆
徐拾級以升終而坦如前除爽塏則蕩乎空曠華棟軒

翔則屹乎瓌壯繡栢騫霞兮拱北辰以開堂綺疏籠日
兮分曲房而晃亮依稀乎變炎冽于歲功齊昕旰而騁
望若乃林木連抱荷若扶桑枝蒙九夏之日幹挺百禩
之霜珍桃晶瑩豔蘄焯爍架懸紫玉階翻紅蕖靡不繞
斯臺而上下紛應接其貽聘至于龍吐芳泉淙淙淩淩
滋畦百澮浮卮九曲旣鬱茂乎蒹蔬亦髣髴乎絲竹于
是乎盱衡寥廓瞻眺徘徊迎暈暎于青阜映麗譙而崑
鬼宰堵之參峯刺漢祗洹之璇拱飛翬跂連廡而戰士
顧飽想積糞而樞馬堪肥右眺龍沙迴環雉堞戍壘突
兀于金虎樓櫓雙騫于閭闔其弘開都市也有無遞遷
羌胡雜選摧毛則獬豸犴鍛羽則鷓鴣鷓紛紛籍籍
籍不可殫名者儼長楊之校獵及乎凱風泠泠引矚朱
明闈廡鱗次衢術縱橫若畏壘兮崇尸祝之遺貌疑井
幹兮題凱歌之嘉石別有鵠印鱗緋之族鍾鳴鼎食之
家門施行馬閭冠雲霄沸笙歌欲誇郭令侈甲第爭陋
嫖姚爾乃回首玄胡憑欄縱目大漢濛濛若出宇下而
渺不知其所窺也則森森武庫穆穆替宗雕甍金碧錯
落交映者非祈靈保障之宇則玄極淨樂之宮至其陳

師旅訓苗獮越雁列鄭鷺聯聚雷震散飛煙匪搜奇于
石壘庶襲跡于方員于是啟鞮屨之譯廣象胥之隸納
呼韓之款圖王會之制式以鐘鼓賚以金幣雖彼左賢
之驕蹇閼氏之妖麗罔不屈膝貢費頻首受事而我名
尊于漢媾意通乎絳利蓋岔蓋焉謬沈焉總關隘之勢
勝與戎夏之情形遞紛紜而贊目一徙倚而無贏矣故
登斯臺者躡景中天鷲精域外環四氣以開襟應八風
而宣籟絃叶棲鳥之府曲度離鴻之塞又或瑤席時陳
山巒並載暢賓主之歡惊淹良夜之未艾至若關山月

林衣集

卷一

三四明叢書

約園刊本

朗碧宇無雲羌笛遙送哀角俄聞望故鄉兮千里牽離
緒兮絲棼斯足雪朱歧之泣消羈客之魂是以僕慚代
馬情本鳥吟覽疆場之虛廓嗟萍梗之浮沈匪登高而
能賦聊寄想于南音系曰黯素秋兮驚沙亂朔風兮悲
笳豔陽逝兮移斲朱景綴兮霜華悄恍兮中惻悠悠兮
天涯

滌懷賦

有序

太常馮公明甫與予少同研席居接闔塵肝膈相傾
宛如一氣荏苒春秋沆躅三紀雖升沈殊路而素交

彌篤往余道經滁陽公命使逆之境上流連署中者
累日夕已送之臨歧且預訂旋車之約握手泫然情
可知已其明年夏杪予還過滁而公已逝矣嗟嗟仁
賢凋謝素交零落旅邸涕洟怨不能已因援筆爲賦
命曰滁懷志千古別云詞曰

繫予言邁杖策二嶠自西旋返兩度南譙覽山川其如
舊悵風物兮蕭蕭望園臺而闕若懷伊人而已遙憶往
歲之良晤維闍茂之首秋念睽離于二稔欣下榻以淹
留繽紛張具傾倒尊卣醉紀瑯琊之勝恍嗣習池之遊

林衣集

卷一

四四明叢書

約園刊本

及乎言別各懷惆悵津津後期歸來莫忘詎乍隔于河
梁條寢門而悲愴今我來思衰柳淒淒眺懷嵩兮煙冷
履凝香兮雨灑尋飛花兮澗溟聆牧馬兮長嘶噫嘻與
懷哉國喪蘭陵鄉摧萬石詞涸潘江酒枯彭澤嗟遊子
以何之空斷腸兮征陌爾乃轉憶君懷肫仁純樸與不
宜惠賜無受獨嘗破產以字孤亦開門而延復汪洋叔
度之陂空洞周侯之腹乃若羊開誠于敵壘簡拯厄于
廣門寬解犢而徒步參吏歡而呼樽渾渾穆穆千載誰
倫至其義憤摧鋒威稜破柱折負嶠之左璫縛金吾之

翼虎痾切民艱躬擻上怒涕可泐于峴碑澤且滿于率
土噫嘻與懷哉竊憫交難鴟呼鳳匿心軫絕絃悲增聞
笛立馬踟躕去來奚適想太丘兮寒山桂燼思玄度兮
空階月黑匪途窮而欲慟忍扣策于西州涉環滁之瀟
列揮涕泗以交流

方竹賦

有序

客有遊雲峯者以方竹見示予舊閱天台志有之惜
未及覩今見標格稜稜特出煙娟高節之外信此君
復端人也爲作小賦記之

林衣集

卷一

五十四明叢書

約園刊本

粵始震房肇發蒼琅森夢澤之箇篋攢汗渭之簣營紛
堅貞以植性亦葱蒨而殊俗幻或雉頭靈通鳳啄然皆
體圓質以儀天孰斷觚稜而方幅唯是東南之美厥有
會稽標赤霞而胤季挺紫筠以爭奇爾其不伍羣篔自
呈峭格稟大塊之端嚴法黃輿之正則畫四序以標芳
削三峯其如式噫嘻是直以方疇與爲刊播清音兮應
賀山之棋局迎涼颺兮掃平石于仙壇試移湘渚不受
英娥之淚倘牟靈壽肯扶子夏之冠庶幾哉影入圓池
似禮青方之蒼璧綸垂海曲定投折旋之瑞湍若遇賞

音于高邁寧羨魯宮之松栢將使棲鸞崑圃允諧韶箭
化龍葛陂猶存翳角

方石賦

有序

台之委羽山相傳仙人劉奉跨鶴飛昇處也有方石
焉巨細等埒擊之應手而碎雖千百如一可稱介石
君子也感而作賦其詞曰

登崇山之翠嶽玩磊石之嶽崎兀侵霞而柱聳蒸出雲
而香披錦文紛其五色瑛彩敷而陸離別有詰曲枝莖
參差蓮萼零陵雲而燕翔臯塗燃而鼠燭奇峭殊名可

林衣集

卷一

六四明叢書

約園刊本

怡可愕差賦形之瓌異孰范模之截然雖摧之而靡勁
詎碎之而體全厥惟委羽逗靈鶴僊特秉方正曾靡敲
偏蓋其受質也稟純德于土精謝大圓之光濟匪繩削
于公輸等洪纖而合契爾其大若割肪折旋寸許細則
鉅釘耒如絜絜縱百千兮迸裂仍整齊兮一矩藉令幻
形鵠印夫奚假于磨礱授目長鯨儼仙人之綠瞳斬焉
坊表肅兮端公繇斯以觀寰區正氣不僭不忒落落如
斯四方維則彼函發華陰徒傳祕匿筭開古牒猶疑傾
側是以搜奇禹貢不列青州之怪向日若邪不曝夷光

之纏遲令嗽齒者益礪子荆之操投分者亟下南宮之拜

鳳覽棠陰頌 有序

蓋聞鸞集香泉尙爭輝于神爵柳繁蠶館亦比芾于
召南良以跡異者思詫其靈悶醇者俗安其理流傳
輿頌自昔猶然何況聲實兼茂循卓雙標者哉維我
邑大夫新都汪侯家崇列戟世嬪韋篋周楨自王國
奇秀全孕龍蟠彩筆軼江郎麗藻分飛花雨是以代
傳治譜才裕宓琴芝顏晬穆謁初日于冬溫素節稜層

林衣集

卷一

七四明叢書

約園刊本

傲凝霜之秋肅軫民艱則請蠲浮稅寧謝職以抗臺
移酌征輸則一洗侵漁至捐囊以代課額定賦役而
平衡殷耗萬口共頌神明清讞牘而併貸蒲鞭兩造
畢傾肝膈至于聿新覺序弘獎羣英霄懸水鏡卽永
叔題才之目宜遜前摹門集鳳鸞若權公刈楚之柄
允堪竝駕唯是海滋枳棲頓作河陽花縣九苞異采
映白鳥已卜三公六月冰壺聽清徽長流萬里樹蘭
翦棘不數范忠宣著作之林金璽緋衣旋看卓太傅
徵書之召某銓伏丘莽誤辱品題樗植空山豈勝輸

削盧號韓國竊附甯歌敢僭頌言式昭詠芟其詞曰
穆穆神君興于豐芭詞揜六朝望隆九枳帝惠海邦鳳
輝棲只薰風叶絃春膏浹耜昭靡察淵寬能飭紀僑惟
眾母賈恆字子有斐譽髦實藉父師岱斗宗韓吐握倅
姬如索玄珠象罔無遺亦若范金冶化惟僮泱泱東海
飲水知慈佇擁烏鵲而陟龍夔載廣康壤以式來茲

百歲翁劉念庭先生寫真贊

有序

先生心遊邃古道廣太丘含元氣于昆龐作邦家之
彝鼎寄託漢陰豈謂膏肓泉石夷猶里社眞稱煙火

林衣集

卷一

八四明叢書

約園刊本

神仙玄晏之著述富矣猶遜期齡景山之中聖恬然
尙慚溫克正如河浮五老表符瑞于堯年所以罔等
三朋堪繪眞于喬嶽某分邈淵霄幸承光霽瞻眸容
之寫照竊擬贊于曲江蓋子壽之言曰工繪其事見
盛德之形容士頌其功知和氣之旁達鰾生之于先
生亦云詞曰

謂舊德五朝儼召爽焉而勇退獨先謂香山九老白傅
猶然而未足隨肩其銜杯樂聖以爲杜吾德權而閉戶
著書又與副墨之子格誦之孫而爭傳夫何以名先生

亦仍求之纂著曰髣髴柱下若五千言

碑誌

明故馮季君甄甫墓誌銘

邑薦紳先生稱好文喜士亡若方伯馮公其子姓多才
賢文業闡著亦亡若方伯公門爲最始公以弱冠成進
士所至樹聲績及爲政於鄉者垂五十年而仲氏水部
公亦後先通籍以廉潔長厚聞已伯子東流君若呂仲
子比部君若舒水部之子襄陽君若愚競起鼎貴比於
王氏琳琅不啻矣不佞舜昌故辱方伯公知俾受書家

林衣集

卷一

九四明叢書

一約園刊本

塾如子姓行因得徧交東流諸昆季及公壻憲副張君
相與切劘研席其歡如昆弟無閒也甄甫爲方伯季子
於諸子中最少其交最晚然其意氣不後於諸君迺不
幸歿其相失最早惜哉當甄甫歿而方伯公葬之文溪
之陽欲自爲銘不果後二十五年而甄甫有遺孤元仲
業爲諸生負雋聲故從不佞受經且暮欲獻謂不佞曰
不孝孤背先人甫四歲惟是一二遺行懵然無所覩記
迄於今非先生誰復知先人者幸哀而賜之一言俾黃
壤猶生卽不孝孤如見先人矣不佞固遜謝不敏而元

仲欷歔飲泣請益迫曰傷哉墓門之木拱矣而猶未得
所爲不朽者是不孝孤終死先人不得爲人子也且先
生亦安忍槁壤泉下之靈而棄之不佞亦爲泫然曰嗟
乎余信知甄甫矣今聞子言使人山陽之感倍深然先
是未有狀甄甫者余念之宛在心目閒謹憶而誌之甄
甫生而魁梧廣顙隆準豐下目光注射如電性倜儻饒
膽智膂力過人自羈州時能馭惡鬻馬縱轡馳上下山
阪見者亡不辟易而意氣揚揚殊自得也其讀書務涉
獵大旨不能類首受帖括其操觚亦如之十五出應有

林衣集

卷一

十四明鏡書

約園刊本

司試輒占高等其上學使者業已錄名會書卷小註誤
竟罷去然中故豪爽不屑屑芥蒂失得少善飲飲必酣
暢客逡巡告困更以大白沃之必使醕客往往大窮如
孟公閉戶周侯舊對時甄甫更自歡暢其跌蕩多如此
而方伯公素嚴庭範慮年少豪舉不無闌入狹邪者其
程督倍嚴甄甫進而奉教唯唯步趨惟謹退亦跡弛自
放不復拘檢柙矣小試之家政亡不當方伯公指閒有
所受令舍人子力不任者以語甄甫能以意消息不盡
如方伯公公亦心是之弗問也與人交率伉直不能面

藏人過不知者憚其凌厲然至片語解釋輒歡洽如初人以緩急請慷慨應之無難色其脫略邊幅不自知衣冠垢敝禮節闊疏尤恥爲驕蹇修富貴容則紈袴子弟不數數見也性雅好古喜集法書名畫不吝指橐購之嘗得古名琴能爲雅操時賞玩以爲適他若六博投壺蹴鞠管簫之技往往不習而工然非久輒棄去而其喜豪飲故自如乍卽之口語小訥酒後耳熱輒歌呼調笑不至驚四筵亦傾其坐客至主觴政顧曲誤則躍然自喜雖燭跋斗闌興逾劇矣然坐是中二豎崇下痢十日

林衣集

卷一

十二四明叢書
約園刊本

卒時萬曆壬辰之七月三十日也距生隆慶壬申二月十一日得年僅二十有一初名若皋己更皋爲陶甄甫其字別號遂昌方伯公諱叔吉世稱修吾先生母周封恭人備內德有大夫概論者以方鮑司隸王司徒兩夫人云水部公諱季兆王父封中憲公健齋翁燮大王父寒谷潛夫禾其先世詳家乘中不具述娶陳爲尙寶公鯨子光祿丞筠女以節孝聞臺使者屢下檄優異尋待命旌其門生子一卽元仲敏慧嗜古文辭駸駸欲世其家娶海豐尹葉公維榮子太學生長春女孫男一崑聘

庠生周君紹恩子懋寅女女孫一瑀許字主政錢公文薦子庠生昌齡子玄錫兆曰牛山葬以卒之年九月四日負甲抱庚南望方公墓里許右去比部君墓百步不佞既爲甄甫志復得其至性者三每醉歸子舍必令人司方伯公起急盥櫛趨侍膳及問周恭人寢以爲常恭人頗善病不喜醫藥獨甄甫手調以進輒欣然受之當其臥病時病已棘猶強起疾行如馳以寬二尊人憂其志可悲矣嗟乎甄甫名行未成他無可稱述然其志故豪已落落不羣矣令天假之年未必不雁行伯仲氏

林衣集

卷一

十二 四明叢書

約園刊本

縱卽不然亦何必滅驃騎乃并第五之名而滅之惜哉秦舜昌曰自諛墓之詞侈而世無不徼尊貴人名位以誇閭里固未有徵言于士者卽有之亦必求仁人之言而元仲獨以屬不佞不佞媿非其人然于誌甄甫不溢矣抑昌黎有云生而不淑孰謂其壽死而不朽孰謂之妖古今以爲知言蓋昔謝煥之不亡也實維有子曹世叔之名聞後世曰有賢婦嗟乎甄甫斯亦足不朽矣是宜銘銘曰疇詒而穀胡受之亡祿疇鄂而棣胡名之獨替將予者人而奪者天耶抑蘭者摧而隳者繇耶孰短

修孰厲水驥而光爾幽爾亦寧止以施孫子于千秋

明故尹母呂安人墓誌銘

余少侍先大夫每聞薦紳先生有躍川尹公者醇德君子也已公卜居同里巷則時時接顏範其內政井井有萬石君遺風余既爲諸生復與公嗣子游狎知呂安人賢矣安人者公繼室也家世鄞人當憲廟時其先侍御公炯與郡伯公欽廉憲公和後先鼎貴以勳名赫煇家乘稱甲族云侍御公有曾孫綸博學工詞章賞射策浙闈至十舉不第乃與南禹豐公結社爲歌詩以泄其牢

林衣集

卷一

十三 四明叢書

約園刊本

騷之氣則安人父也母某孺人生三女一子安人其仲生而沈靜勤敏夙嫻女紅常閉戶綴紉竟日不聞笑語聲父母賢之閭黨有藉蹇修進者曰非吾女匹也輒謝去而是時尹公旣貴爲刑曹郎元妃封安人陳旣有子若女矣陳安人抱羸疾久在牀第聞慨謂公曰吾病且不起君必繼與冥漠而以是孱子女遺之不可知何人死不瞑矣亡若當吾世而擇賢有德者授之死且不朽公不可則絮泣請益迫公不得已領之而最後聞呂女賢遂納篋焉安人歸而陳安人見之喜謂公曰眞賢媛

也亡慮不宜家矣時子某甫六歲女甫四歲命之拜曰
眞而母也已手筦鑰授之曰眞內主也蓋自是陳安人
疾小損亦時有起色室中雍雍無閒言安人事陳安人
如姊陳視之如妹子女之事安人一如陳而公左右兩
安人閒夷然靡二志一如陳未病呂未入室時安人之歸
七年而後陳安人歿其拊子女慈愛有加汜於婚嫁猶
然一日矣已安人自有子女不辨其孰爲己出也公之
再補刑曹郎出守咸陽皆以安人從爲慎局鏹飭僮僕
虞虞惟謹雖米鹽果蔬之細躬節嗇以佐公廉以故公
得專精吏事所平亭疑獄郎署推名法家其治郡多惠
政尤以廉潔聞皆安人力云公懸車蚤衰裝蕭然安人
旦暮操作佐公營第宅拓旁畝林居十五年不自知宦
之拙矣安人不及事舅姑歲時伏臘夙興潔精蘋藻不
貸手一人其祀陳安人亦如之公篤愛二兄生爲之治
田宅歿爲之具棺衾葬爲之營邱壟婚嫁爲贈資斧諸
子中才可教者爲延明師訓之成立常先後其意一一
贊助焉性安澹素居恆椎布無異里媪至調恤孤惻亡
所吝呂氏中葉弟有遺孤以子畜之終其身有穠而歸

者泫然與之處歷寒暑七難色訓子姓諄諄無墮先志
雖篤老猶爲之綜家政無令妨學業長子守宇遭危疾
坐臥榻前至瘳迺已生平素健絕不近醫藥偶下痢謂
家人曰吾已矣促治具取所御簪珥衣襦一一注記分
遺支屬皆徧取故翟禕霞帔授某曰此而母命服也善
藏之當屬續時子孫環泣請治命曰務孝弟勤讀書無
一語及亂其明達知大體如此有子三俱庠生長卽守
宇娶某及長女皆陳出安人出者守宅娶某守宸娶某
女適某孫男七三爲庠生云云曾孫云云安人以嘉靖

林衣集

卷一

十五 四明叢書

約園刊本

某月日生以庚申歸歸二十四年而公背後三十四年
而卒時萬曆丁巳七月七日也享年八十有一又三年
爲萬曆己未嘉平之某日守宇等將啓公南山之兆合
焉乃泣血頓顙請銘其墓余向已狎知呂安人賢矣復
何辭謹按某所手次行述輯而誌之安人未被綸命然
跡其賢懿不忝爲公妃無負陳矣於禮得並稱安人云
誌曰易睽之繫二女同居志不同行固未有耦俱而無
猜者也又寧有繼而耦室者乎徵陳安人之賢而達生
安得有呂安人徵呂安人安能使其疾小損至七年而

終豈不難哉嗟乎嗟乎以一呂安人而令伯子之孝不
名爲伯奇二仲友愛不必爲王覽郡伯公刑于之政優
于君家吉甫豈不尤賢乎哉是宜銘銘曰書美于媯邈
矣二女不可追次乃在晉式下叔隗用克媿于冬日之
衰千載而下嗣者其誰斯藏斯徵是惟呂之音徽

林衣集

卷一

十六

四明叢書

約園刊本

林衣集卷一

林衣集卷二

明慈谿秦舜昌虞卿著

傳

馮長公傳

馮長公者諱若呂字溱甫世爲慈甲族其先多顯者詳家乘中父曰方伯修吾公叔吉政績烜著所在尸祝而其守池陽及爲江防治兵使者尤著自留都三輔雖婦孺亡不習其姓名者有子三長卽公次刑部主事若舒次若陶公美丰儀廣顙豐下神采奕奕見者皆竦甫受

林衣集

卷二

一四明叢書

約園刊本

書過輒成誦下筆儻朗韶秀灑然絕塵未弱冠補邑諸生試輒高等嘗一不得志於省闈輒扼擊起去而游南雍其試南雍又輒高等當是時先後兩司成爲故相潁陽許公洪陽張公並負倫鑑其賞識傾天下士一見以國士遇之謂生眞方伯子矣壬午舉應天鄉試上春官不第已主事公以壬辰從弟太僕公若愚以乙未並成進士而公待公車故自如方伯公貽書促之選公負氣豪甚猶芥視一第慨曰違命非孝也違志尤非孝也無寧從志乎自是凡三上而最後奔方伯公喪歸哀毀如

禮服除再上又不第乃泫然曰吾不能負懸地下矣遂
謁選人授池之東流故五柳先生菊圃地也公躍然喜
曰吾飲菊江水以滋先人芻蕘何快如之時江南大澇
邑受浸尤酷至則躬自節嗇捐月俸及約諸經費益以
贖鍰市湖湘粟以振之而單車徧都鄙計口分給心力
爲殫於四郊廣廬舍以粥饑民所全活者以萬計邑介
江南北楚婺之交居民雜糅其土著者不能半訟則移
牒旁郡邑無可究詰而前令多飢餓媮取滿歲以去民
視令如尉視尉如嗇夫公奏記臺使者訟必屬令諸自

林衣集

卷二

二四明豫書

約園刊本

旁郡邑移逮者禁不遣而旁郡邑無以奪公諸訟者苦
不決卒頰首就訊公衷情法剖決如流案牘如洗邑自
是知有令矣先是主藏吏貯賦私家取什一息而公帑
顧枵如公微知之示將檢括者吏恐急丐貸以入乃納
諸大櫝扇鏽甚周令自後上賦者得自投其中不復問
他羨非解發不得啓櫝不峻法而宿蠹一清有舫泊江
泚密遣游徼偵之獲大盜十有七人亡一得脫者諸崔
苻之奸爲遠徙不敢近東流界鄉有陂池一屍浮出莫
知誰子令暴於中途往來屬目者竊指云某生而左趾

闕一今亦如之公於是窮竟果婦翁殺穉墮之池以服抵罪其發摘姦伏多類此一時循聲流傳畿輔謂大小馮君昔兄弟而今父子也而適聞母周恭人病立遣婦子歸侍疾而亟乞休終養諸監司察公治行獨最持不可而周恭人病亦良已乃奏績錫綸命如甲令而是時方伯公去池陽可五十載池人追思之爲請祀學宮而公亦偕父老羅拜祠下人稱兩世甘棠爲盛事云邑濱江而城其南隅滂下夏秋水漲則輕舸與睥睨等乃伐巨材杙其趾贅石爲長隄以障之屹然狂瀾砥柱費且不訾功垂成而去惜哉公治凡五年積薦剡至七八章尋當內召而會淮離使者素器公有所咨於旁郡邑其事頗洩大觸當事者忌用蜚語中之公聞而喜曰吾乃今而得爲人子矣夫夫鬻我而愛我也遂拂衣歸而侍周恭人匕箸甚歡至隄八秩終其哀毀如方伯公時公爲人慷慨負氣節意所不可百折不撓至片言相合輒傾倒無間而孝友天性不事緣飾方伯公及周恭人內政嗃嗃務盡其歡主事公以王事卒於旅邸蒲伏炎暑數千里持其喪歸撫二弟之孤如子方伯公有遺

產未析呼諸子誠曰此而輩業也任汝分之我弗與知
矣而諸子亦體公意交相遜讓戶以外弗聞也其廓落
好施自浙以東西及兩都人士無間識與不識爭慕馮
長公千里誦義人有緩急若取諸寄其故交負責多至
數百千金置弗問已與人交好游賢豪閒嘗受業郭司
馬青螺先生之門於燕善相國方中含公於楚善中丞
汪靜峯公於吳越尤眾初鄉薦時諸同門載酒棲霞而
虞山陸公化淳卒中惡客皆驚走獨公與宣城葉公永
盛急呼湯藥調治久之始甦乞送之還乃去眾皆媿服

林衣集

卷二

四

四明叢書

約園刊本

焉生平最好客客至必流連竟日繼之以夜旦日復然
其飲自謂得酒中趣花晨月夕徵歌度曲足令高陽奪
色竹林生氣其拍浮豪縱時雖江東八達不過也歲戊
午公年六十有五於中秋日徧過諸宗戚殷勤款密夜
則命酒暢飲極歡閒以絲竹申且不寐因示微疾至七
日且革家人環泣笑曰柰何作兒女態相向耶遂瞑初
方伯公舉公于令署生有貴徵因自號曰泰源志所自
也子元奮元宣並有文學能世其家

逸史氏曰世稱仙令若勾漏丹沙事誠有之於今未有

聞也長公少慕松喬之術見石室丹經手自詮纂有味乎其言之晚遇異人彭翁授以積氣鍊形金丹玉液之法試之頗驗遂飄飄然有凌雲意予習長公生平故義俠人也其卒也又若蟬蛻塵壒豈稚川抱朴之流與然其得全於酒於彭澤優乎有餘矣

別駕蓋庵秦公忠節傳

公諱碧字仲文別號蓋庵少博學工文辭與從父煜齊名每試遞相甲乙弘治己酉御史將入棘先期都試士以周禮儀禮家禮發策公條對詳覈爲全浙第一人而

林衣集

卷二

五四明叢書

約園刊本

煜居首遂同薦於鄉屢上春官不第最後謁選人判江西饒州府事著廉能聲會萬年縣姚源賊反勢猖獗甚督撫陳公金討平之其黨尙眾而巨魁王重七等陽聽招撫實懷異志公受檄署萬年時縣署初建百務草創吏胥皆爲賊耳目上下洶洶公苦心經畫眾稍戢而兵使李情謂亂民宜重典特用嚴罰繩之益不能堪遂復叛殺兵使縣佐指揮等官幾十人公亦被執賊帥號眾曰秦爺清廉好官不可害公厲聲罵曰我朝廷命官豈向賊奴求活耶汝不敢殺我我必寸斬汝矣因顧左右

曰官兵何在賊驚疑有伏公遂遇害時正德癸酉十月也事聞詔立祠旌忠磨一子散官議贈謚未果士論至今惜之後二十年從姪中丞鉞撫江西自爲文祭祠下忽有風霾之異人謂公精靈不朽云

仲父方伯懷庭公小傳

公諱鈞字鳴和別號懷庭嘉靖庚戌進士性和而介與人交逡巡退讓接童穉必以禮至辨是非嚴法守雖勢焰薰灼不移如山筮仕南太常博士故事有事太廟中賈人與堂卿並南向坐而博士侍公始至見設席如故

林衣集

卷二

六四明讀書

約圖刊本

怫然欲去中賈人曰先生難我乎此例也公曰非國典誰能遵之自是博士別燕他所著爲令晉南吏部郎考功丁巳大計持議侃侃冢卿恚曰司官何動相左耶公曰某知公道宜爾不知其他嘗考績至燕所執羔雁惟悅筮諸要津目之胡盧曰吏部郎何挾之奢也公對之夷然然坐是滯留曹十餘年不調嘗除夕家人覓百錢市薪不得以問公笑曰元旦突無煙一歲中清寧最爲吉祥已晉山東副臬治兵青州青故盜藪懾公威名諸椎埋作姦者匿影行旅野宿亡恙期年以內艱歸齊民

巷哭揮涕如雨輒車至十舍不得發時恆王好賢雅重公每宴賜算器食外未嘗以幣交至是以古研贖辭曰姑爲鬱林裝若何公不得已受之比啓函則百金藉其下公驚并研返之王媿悔特爲書謝答服闋補湖廣辰沅兵使適紅崖苗叛公輕身往撫之酋眾盡降於是旁二寨相繼納款所省兵力不訾亦絕口不言功尋參藩滇南所治銀場又地饒珍寶先任者無不滿贏公獨垂橐歸右轄陝西轉江西左帑藏出納屬郡佐廉能者更任之俾署名封識未嘗一啓其緘有羨額悉申貯爲經

林衣集

卷二

七四明叢書
約圃刊本

費不染一塵時撫臺姑蘇楊公有所受囑勸行錢法民稱不便其督責頗急公與議不協至伉詞不屈遽上疏乞休諸藩臬友寮固留之曰聞已推公中丞矣矧考最且及獨不能少待耶笑曰士固有志乃卽日登舟直指君亟挽其維則已揚帆逝矣里居杜門埽軌片牘不入公府布衣蔬食蕭然如寒士比卒至不能具棺衾閭里皆爲隕涕云生平至性純篤事繼母以孝聞伯兄鐸績學敦行爲世儒宗公受業其門終身事之如父自少博極羣書下筆氣格滄瀚如高江急峽下瀝瀕不可以舟

其成進士爲本房第一人時關中王太史允寧以文章高視一世鮮許可每見公輒歎曰惜哉令我得公卷必冠南宮矣與同邑顏侍御冲宇先生爲同年友最善恆以道義相規其氣節絕相類云敷歷凡三十年所至樹聲實於清操尤著嘗曰吾清夜自思所不及孤竹二君子不能食西山薇耳公歿後督學劉公採輿論祀之學宮江右志名宦別有傳

邑志小傳

袁公燁

林衣集

卷二

八四明叢書

約園刊本

袁燁字懋中建極殿大學士謚文榮少負異資英敏絕世嘉靖丁酉省試第二戊戌冠南宮廷對及第第三人由編修洊歷清華入參政府皆出手敕特簡受知世廟最深每機密重務不以咨元輔而以密劄咨燁所匡正亦最多外廷祕莫知也而其披瀝忠赤無大於定國本者先是儲位久虛二王並居外邸人情洶洶時以禮卿入直西齋宮諄諄爲言天倫定序上不能無動而難于冊立因切言冊立可後景王之國不可後耦俱相猜人心疑慮上深然之亡何傳命景王就封中外鼓舞稱慶

而不知納牖功也他日忽遇閣臣議傳繼事語多叵測
力陳仁孝天性曲爲解悟疑始釋潛邸乃安初冢卿闕
分宜欲用其鄉人歐陽德廷議無不唯唯煒爲少宰獨
持筆不肯署眾皆愕眙虜闌入牆子嶺寇通州上方有
祈年祕祝莫敢聞本兵楊公博急調發逐之出已偵有
伏復大創之而上怒博不先報又不早計使寇深入欲
寘之辟公微聞之密疏云不報之罪可原逐虜之功可
贖卽罪博今誰能代博者怒遂解煒亦絕不言而最後
楊司徒俊民每言于先人有不報之恩今猶耿耿其爲

林衣集

卷二

九四明叢書

約園刊本

德如此居恆每爲時宰言輔臣卽無他善狀令明主有
殺諫臣名誰爲貸斧鉞地下者而自是攫鱗者亦稍稍
得輕譴嘗兩主鄉會試所得多名世士如壬戌鼎甲三
公皆相前此所未有也慈故運糧輸廣積倉航海險遠
而諸倉場徭役之隸餘定者俱借派于慈自丙辰中寇
始成城民力倍困于是畫便民三事上之得改運廣安
倉就近易凡徭役之借派者各歸其縣留稅銀七千四
百有奇募兵爲城守慈民始甦眞百世利也煒旣以知
遇非常鞠躬盡瘁卒上震悼累日諸卹典加峻而素峭

直多取憎同官故僅得中謚論者謂焯入相時前政濁後政鷺獨頡頏其間皎皎無所遜避而孳孳若若遇特在恩威不測之主卒能善始終如一日凡爲焯者亦難矣哉諸著作多散佚門人故相王公錫爵稍爲詮次得若干卷藏于家

周公大昌

周大昌字德茂中正德丙子鄉薦時年二十有三凡九試南宮里居幾三十年絕不以事干邑庭初任江西樂平教諭陞贛之瑞金令行莅任已入境矣適鄰郡司理

林衣集

卷二

十四明叢書

約園刊本

以事至其人嘗執弟子禮于大昌於體不便卽返棹且日家人怪問鶴舟胡復西也曰吾歸矣先是其父驎以貢爲汝州司訓其郡太守馮志者同邑通家子也聞前驅至道經汝州意難之遂解職歸而是時昌初下第卽取道趨汝遇諸途曰兒緣何至此答曰馮子爲郡大人安得留政來負擔耳相慰勞欣然昌博學工文章其解經爲世詩宗

楊公孫仲

楊孫仲字敬伯少負志節有世父柳塘公遺風以嘉靖

壬午舉鄉薦累上公車不偶授儀真令邑當江淮要衝
商賈輻輳號稱財藪仲奉柳塘公所輯治縣譜事皆稟
式門如止水有巨商以珍餽不得閒囑關人密置案席
見之痛扶屏逐焉自是雖交游筐篚絕跡矣諸郵傳絡
繹以仲廉無敢橫索一勢璫窘簿尉甚迫用微言輒引
去異日還過戒從者毋得犯楊令君秩滿當奏最以忤
臺使者竟歸橐裝蕭然室無別構畝無旁拓非公事不
至邑庭非知交不赴宴飲以不獲貶封先人自念潛橫
非大節序不一御冠帶有腴田壓邑城不受補地遇橫
侮者輒避之可謂清修醇德君子矣子世思宗慈湖學
與仲並祀學宮孫守勤會試廷對皆第一

葉公本

葉本字敦叔性至孝十八應省試僞傳父嶺南有他卽
辭歸督學嘉而許之嘉靖壬午薦于鄉五舉授南樂令
俗故輕生小忿爭輒雉經或自溺乃嚴救鄰里不救解
者罪之俗頓革所生全無算屬大蝗率民廣捕以易粟
歲不爲災駕幸承天檄本治行宮六百里勞績爲多尋
考最定擬南臺矣以失學憲意調知上蔡憂歸再補雩

都二邑皆著清節如初已同守太平有盜殺麥商汰其舟蕪人汪夏得而載之不勝拷誣服株連二十餘人本盡脫之而眞盜果出繁昌駱熹不良死其父挾以傾怨家察其詐雪一族之無辜者四載擢南刑部員外郎尋中蜚語歸本宦家蕭然而急於倫義推遺產悉以分兄弟并植其子與姊之子伯叔氏歿爲養其母代之烝嘗修其封樹族無祭田則捐租以倡且嫂楊及友人陳進士原理妻早寡力請于官厚費旌其門所居環堵左右皆圖史日相對不輟臨終賦詩有鄰侯只有藏書架季子曾無負郭田之句所著放游鳴秋清源等集十餘種藏于家子壽春乙卯舉人四會知縣

王公萱

王萱字季孺父交舉省闈第一由翰林庶吉士爲給事中嘗折故相翟鑾著直聲萱其季子也生而神明朗秀軒軒霞舉見者無不爽然自失其羈牂時已覃精墳索以詞賦傾諸作者萬曆己卯舉于鄉癸未舉南宮第四人改庶吉士授編修一時館閣名公及其儕偶皆折節下之其爲文意氣躡厲如驚飈蓬勃洞駭耳目詩如高

山大壑崒嶽曠遠臨池如靚妝倩女閒雅娟秀直逼晉人嘗語人曰二京三都之後無賦兩漢之後無史卽以我明之盛猶闕焉將無令後代起乏才之歎乎而是時屠緯眞入爲儀曹郎兩人相推重傾動都門諸子墨客卿無不心豔其聲以得其尺楮爲珍異葺亦以此自喜酬對忘機而又雅好客居恆引觴選韻大醕放歌且暮相續猶未慊丙戌持節冊封晉藩歸省封樹賓客日益進其飲酒賦詩興亦益劇遂病病稍閒尋報命至潞河卒時年三十二所著有雲山日記采眞篇季孺詩選喬

林衣集

卷二

十三四明叢書

約園刊本

雲館全集並行於世

秦公金

秦金字懋南初治毛氏詩以春秋第嘉靖癸未進士用憂歸服闋謁選人時無錫秦司徒與同名諷之改且得要署金曰禮子生三月父命之名先人在猶不敢矧旣歿忍以一官易乎卒不改司徒大恚銓曹亦以是授南京刑部主事戊子分考南畿得士如唐太史順之汪都憲南寧皆爲名臣尋轉南祠部郎時分宜爲宗伯金佞直事多與忤甚憾之有靈國寺僧黠而穢私請僧綱司

印分宜許之金堅執不可其隙愈深每借他事欲傾之不果壬辰出守吉安甫莅郡遂以計典中之金歸留心桑梓有利弊多所建白其於敦倫睦族宗祀典禮尤所重聞島夷寇上海黃巖等邑豫策慈必中寇亟倡議成城以築室謀止後三年寇至受禍最酷人始服其先見云貌清癯瘦削如鶴立抵掌娓娓不休壽九十有三季子文潛乙卯舉人德藩長史

劉公士遠

劉士遠字伯鴻嘉靖壬辰進士初改翰林庶吉士以中

林衣集

卷二

十四四明叢書

約園刊本

貴譖當事者命再試遂與呂光洵等俱溢額筮知長樂縣未三年以察廉擢山東道御史出按畿輔權貴斂手會章聖皇太后梓宮耐陵擇臺臣負才望者慮蹕首與焉至通州輒劾內官閹綬緹帥趙俊貪橫不法事得旨逮問一時宦寺以下無不凜慄奉約束唯謹比回鑾復條上三事曰覈吏治普文敘紓民力皆切當時利弊俱報可達自以得際聖明益自發舒乃摘吏禮兵工積蠹上之語侵靈寶許太宰而是時上方嚮用靈寶且欲大拜遂以排陷大臣外補臨淮令蓋猶念扈蹕功也遂治

臨淮如治長樂不以遷臣自放尋判汝寧再知合州所
至尸祝中外方跂望賜環且大用而靈寶已入政府憾
猶未釋竟以襄府長史終老矣遼風裁峻挺才具警敏
遇事咄嗟立辦浮沈二十餘年若長沙膠西齋志以歿
歿而家無遺產所居不蔽風雨寢丘之賦不贍饘粥士
論惜之遠曾祖煒正統閒爲名給事與林聰齊名以直
節世其家

劉公志伊

劉志伊字可任生而清慎外和中毅仲父方伯廷誥甚

林衣集

卷二

十五四明叢書

初園刊本

器之嘉靖丙辰成進士授吉安推官以廉明最召拜山
東道御史視長蘆饑時景藩之國分宜私人鄒懋卿爲
總理所至繹騷伊靜鎮之商民安堵再補河南道按山
西未至出僉楚臬備沔陽兵築新隄三萬六千丈修舊
隄三萬丈有奇開馬臺淤河三十里諸所建暨詳荆西
政略中隆慶改元晉閩藩少參庚午副滇臬發黔公朝
弼不法事奪爵逮至京峻拒土司饋風紀肅然擢參廣
藩適倭寇雙魚與趙可懷合兵擒斬五百餘級又設伏
半渡擊之殲其眾制臺殷正茂以大捷聞已大征羅旁

以總憲督二帥鳩巢深入功最多先後皆陞俸錫金晉
湖廣右轄尋轉左時計臺何心隱上書諷江陵終喪直
指希旨捕繫將陷之暱謂伊曰心隱本吉水人梁汝魁
公司理時以無行訊決故牒存否伊直指曰某在吉未
嘗訊梁汝魁脫有之安知其卽何也直指語塞士論快
之己卯入計所留羨金六萬有奇以失江陵意投閒南
中歷京兆廷尉三載江陵歿改北尋陞工部右侍郎言
官摘張懋修楚闈事詞連伊伊辨闕中事甚晰太宰楊
巍合疏留之竟致政歸絕跡公府亦不輕發一言時同

林衣集

卷二

十六四明叢書
約園刊本

年顏鯨雅同志操每爲郡邑陳說利弊無諱或以諷伊
曰顏兄已言之矣使吾兩人一爲杜密一爲劉勝不亦
可乎歷仕三十年廳事僅旋馬如故自題其柱曰正直
忠厚夙佩名言恭敬溫文力行古道其素志如此以萬
曆壬辰卒六十五禮官議予全卹賜祭葬如制

張公學

張學字維勉治春秋爲諸生高第以奔母喪嘔血幾殆
父歿毀瘠遂得羸疾不能應制科然其淹通六籍愈邃
家故貧舌耕以資二弟割數椽畀之爲季授室又復鰥

并挈其子哺焉字伯兄之孤如子仲父無嗣序當及學
屬有旁睨其產者輒讓之弗與較憐從弟繆綬非其辜
特捐貲贖之其篤於倫義多類此嘉禾不見沈嫠苦饑將
自溺急周之至垂橐歸倭躪王江涇逐一叟及諸河急
鼓棹往同舟者弗許此曰等阨耳忍弗濟是代爲寇也
去刃尺有咫卒與俱脫有貴介子挾麗妓夜藏之家塾
莊坐達旦學憲包檉芳故門人也嘗歎學七十年處子
斯實錄云以子九德貴累贈陝西按察使祀鄉賢

秦公汝際

案卽虞卿先生之祖

林衣集

卷二

七十四明叢書

約園刊本

秦垠字汝際少攻文業族子中丞鉞與同研席甚嚴重
之一試有司不偶輒棄去隱于耕性端方寡言笑是非
侃侃雖宗老丈人行見之凜如每宗祠燕饗垠在坐眾
皆默然他日鄰媪聞歡語輒詫曰此君不在耶何嘈嘈
也其信于宗黨如此王父朴庵公以齒德賓於鄉至九
十餘事之盡孝會病嘗雪夜獨行訪醫藥虎伏道左不
知也後數人踵至忽咆然驚走有母弟頗傲愈益愛之
無幾微見詞色嘗深夜有叩門者啓之其人投橐曰吾
負責多將挈妻孥遁猶不忍負君握其手欲與言竟去

不顧生子四皆業儒季鈺仕至左方伯冢子鐸字道鳴
鈺異母弟也以明經教授里中學者稱爲道鳴先生故
其字獨著幼失恃事繼母以孝聞生而嗜學自六經子
史及濂洛諸儒書無不手自詮纂其少時嘗客樵李某
氏家塾偶犬銜刺繡履墮牀下主見之疑其妻有私恚
甚手利刃夜令妻潛叩門門啓將殺之妻亦無以解也
如其言鐸詈曰安得婦女聲至此急呼取火主皇遽去
旦日詰之但唯唯崩角謝罪已問知其故卽日去終其
身不遠遊而里中從遊者日益衆尊之若西河河南無
論通德里門矣嘗於逆旅見門人落魄呼與俱載其人
故無行居一二日乃肱篋去置不問絕不言其姓名方
伯旣貴遵其訓如授經時敬之如父云

錢公維垣

錢維垣字完甫幼聰敏隄成人年十三補邑弟子員歷
試不偶事王父封翁至孝父僉憲公照卒于官伯素封
季亦蚤達然封翁獨安孤孫養朝夕愉愉若不知仲之
早世與二子之在者比八秩以稱觴肅客誤折足僵臥
牀第閒維垣躬率繼婦任晨起代之盥櫛匕箸代之舉

衮禱代之覆至爲承大小遺必親必謹如是者十有三年當道聞而異之旌其闔爲順孫而未及於任以從夫之義也子文薦萬曆丁未進士工部主事以詩文名于世

秦公吉

秦吉字敬夫正德癸酉與從子中丞鉞太守金同舉于鄉五上公車不第授萍鄉令歷七年蠲潔如一日偶流賊猝犯境劫帑金五千邑民號呼令廉安得償又恐遂引罪去爭相勸輸助其數反溢於前吉謝曰罪獨在令

林衣集

卷二

十九四明叢書

約園刊本

死寇死法等也敢煩父老一一慰勞還之時監司素重其清以此益歎異曲爲解釋得奏最擢知濮州居數月當入計自旅資十餘金外不攜一幣亦不謁一人當軸者謂矯矯非人情遂左遷龍巖令又以介特忤觀察錢世賢意卽致政歸一時中丞直指使者皆盛祖帳送之郊世所未有也家居蕭然環堵獨與劉世龍馮志結社東山卽景賦詩徜徉自適各以清節相尙爲士林所宗

林衣集卷二

林衣集卷三

明慈谿秦舜昌虞卿著

序跋

芙蓉館集序

不佞自歲丁酉辱收師門獲侍吾師致吾先生與縱談古今經世大業大都原本六籍馳騁二京躡躐百代而要歸輸寫性靈疏瀹事理以獨隘其所得者而已其斤斤摹古工鑿悅弗取也某聞之唯唯竊歎先生當代作者與何言之衷也已釋褐爲郎則先生有典試之役四

林衣集

卷三

一四明叢書
約圖刊本

方傳蜀錄至爲紙貴都人士稱師水鏡不啻今德操云已治餉治兵樹疆場之績則吏士超距名王脅息乞去塞上閱數年而厥功愈著至勤天子嘉勞特詔增秩則又歎先生真社稷干城非沾沾工文人薄技已也今先生所莅越越濱海諸郡邑方藉屏翰文武恬熙而鈴柝之暇爲輯芙蓉館集梓成屬某序之因得縱觀所撰著其大指如前所持論若合符契而體莊節和理澤思逸菁藻時時豔發而味其旨復還雅馴其中闡闢縱橫復有語所不傳之致諸繪景詠懷之什於境靡不收於情

靡不暢不斲刻畫古人而於古靡不合是爲難耳昔臧孫稱不朽者三言爲後先生早歲敷歷吳楚燕趙之墟轍跡幾徧天下其德深其功偉畏壘鼎鍾之業駸駸日新並在不朽而顧自託千秋於竹素何也夫言與德功局殊而用一也以文人之技工言而立者皆虛以經世之業工言而立者皆實今睹集中所具若紀治行軫時艱恤民範士與夫輶軒所涉竿牘所馳往往參半焉則先生生平所豎立可知矣蓋先生邈前二者不任而姑託之言某誦先生言而知三立具是矣昔子瞻舉廬陵公門下所闢揚師業振起一代文明之運傳之到今今某序先生文滋慙負耳雖然先生有太翁蓉江先生鬱爲詞宗而伯氏中祕君雁行著才名先生家自爲眉山奚藉門下士羽翼爲也先生有他集久行世世爭慕好之如某言烏能重先生政託先生以不朽矣

世澤錄序

不佞故聞天台有林恭肅公云其立朝風節廩廩德讓君子也至內行醇備尤以克孝聞心竊嚮慕焉而比從邑博士鄭君所得其世澤錄讀之而益有慨也台固多

世家然泉溪林最著自宋初迨我國朝歷世二十歷禩
五百其閒賢達聞人代起不乏大都敦彝常砥名節遠
巡篤行而其博雅好文往往卽境會心發爲歌詩如錄
中所具概可觀已不佞受而卒業其人不必盡列於書
升然皆湛思載籍詩不必盡嚴於格律然皆直寫性靈
蓋林氏淵源所濬發深矣夫自古纓紳之族赫煇譜牒
閒至家稱列戟里著鳴珂盛矣藉令名德無聞文獻不
足於世澤何取焉故西京之盛亡若金張而世著忠孝
必推稔侯東京之盛亡若袁楊而家傳清白必首關西

林衣集

卷三

三四
三
四
明
叢
書
約
圖
刊
本

唐之盛亡若房實而象賢繼起必推太尉則所重可知
已茲錄所輯者詩其所繇傳世者非詩也閱是編者知
恭肅而上其繇來遠恭肅而下其流澤長將望泉溪德
門與華頂玉霄並而爲林氏子姓者於以保世承家尙
亦有遐思哉抑不佞載考鄭之先侍御公貴模先生與
林考功公同年舉最相友善其所贈詩具錄中故稱通
家累世今復見博士君益歎台故多世家矣

詩經鼎來序

有搜珍於縣圃者符采溢目不勝收也閒取一焉曰此

如白虹天也有簡乘於黃澤者越影聯翩不勝圍也閒
取一焉曰是河之精其神乎或詫之曰胡所取之約也
曰吾非求約也求博也吾以一天琛當百珉瑊以一神
駿當上駟數十乘此之爲侈而況其多乎予邑大小馮
君擅臨淄之軼才秉維摩之朗鑑一燠一篋自相師友
其言詩也攬菁華不斤斤菁華程法脈不斤斤法脈裁
格調不斤斤格調往往從筆墨之妙外領風神意象之
表獨標玄賞或峻而整或幻而奇或雋而葩或峭而古
或漾瀾鴻篇或幽微遠景要於情靡所不嘗於境靡所

林衣集

卷三

四四明叢書
約四刊本

不臻而於品靡所不備其有天機耶其有神靈耶雖作
者亦不自知其所至而入二君之品目高可以立幟詞
壇次亦不失鼓吹風雅詩曰維其有之是以似之是則
二君之爲詩選也是編也遊才則羅寓內之名儁徵文
則窮藝林之奇藻積牘至數十千所汰者十之八得文
八百有奇余得而寓目焉其光怪異狀變化無端不覺
愰然躍然曰是從瑤華中覓白虹權奇中索河精卽所
汰者猶堪奪珉瑊敵上駟而矧此之爲天琛爲神駿哉
昔抱朴子之評文曰無非夜光而作典論者曰騁騏驥

於千里予於鼎來之輯亦云

大小馮君合稿引

昔稱謝庭之秀盡皆蘭桂王氏之雋觸目琳琅吾邑之於諸馮亦云乃今觀兩君可知已言仲才如驥馳峻阪騰驤超忽千里一瞬而和鸞之節自如又如支公說法微詞玄解總歸真諦而靈通處可使天花亂墜石皆點頭爾弢才如獨鶻摩空俯視一世非惟不受笈籠兼亦不假風力又如清鐘大鏞蒼然古色淵然曼理不待諧宮商測音響望而知爲重器言仲知名逾十年一時才俊皆爲避席爾弢最後起遂與齊驅是爲奇耳馮自方伯水部二公鴈行爭鳴鬱爲名碩而襄陽公兄弟繼踵不啻三珠樹云今兩君則襄陽子水部孫也襄陽公醇德如太丘風節如陳仲舉惠澤如羊叔子文章政術風流儼儼又如杜元凱山簡遺風卽異時王謝諸名公未易過此淵源流暢以及兩君宜然哉宜然哉世徒見兩君一旦奮起旗鼓相當輒欲從詞壇拔漢幟共詫爲奇乃襄陽公之有兩君固未爲奇也

白雪草堂師生合稿引

林衣集

卷三

五

四明叢書
約園刊本

本顧於世味落落雞壇之盟亦妙投契然閉戶片語傳
響藝林凡四方恢奇淵穎之士靡不稱僑札之分恨相
知晚卽執經北面者盡江以南北才儔也而最後於里
社中得高足馮次牧氏相得歡甚不啻南郡之有康成
明略之奉眉山矣比歲下帷卒業本顧旣不窺童園而
不佞獨時尋蔣徑因獲縱觀近藝大都湛深閎肆算出
筆墨町畦之外其高曠孤詣如中宵鶴唳頓令塵囂境
界廓然開滌若從風相和清音競發則次牧爲之九皋
今所梓白雪堂稿是已是編出當令長安紙翔郢中曲
寡國門之價自在異時沆瀣一氣其以白雪爲前茅端
自今日定之矣

醉鄉小史引

陳思王稱子雲酒賦辭甚瑰璋頗戲而不雅今觀醉鄉
小史亦諸君戲筆耳然義取真率引人著勝地一何彬
彬雅馴哉蓋自昔風騷之士率以白墮逞豪高陽之侶
亦以翰墨生韻夫其酣暢於詞乃其得趣於酒也或曰
鑑辟遠恨諸作不啻臚僕區於樽前幾令歡伯無色何
趣之足云予曰此政諸君之所爲戲耳閱是編者將謂

是賓筵之南董抑詞客之卮言與

隴西選貢文錄引

侍御高公之按塞上也風猷振肅聲靈遐暢諸鎮將吏
亡不濯磨矜奮於絳騶青橐之下諒哉文武爲憲矣則
之部歷試臨鞏都人士士亡不濯磨矜奮若百昌之鼓
冷風潛鱗之應豐隆蒸蒸乎盛矣先是諸試藝業有彙
刻而其中茂材異等遴而上之司徒則奉詔令所選貢
士也又拔其雋粹之而不佞獲寓目焉其結撰固人人
殊其斐聲多姿靡不法陳爲新砥鏘爲穎斌斌澤于爾雅其

林衣集

卷三

七

四明叢書

總圖刊本

致一也國朝廣厲學官首崇文教惟兩畿甸特命直指
使董之他郡國不敢望也今上不以西陲鄙遠用簡蘭
臺石室之重臣廣蒐而薦進之其重與兩畿等宜多士
之斌斌質有其文稱茲盛典不虛耳世人局於耳目輒
以風氣閎人人亦以風氣自閎綜其實不然夫今之西
陲猶昔西陲也其山川封域未改也諸生亦聞而之鄉
諸先哲乎遠不具論唐若端卿稱三絕君虞每一篇出
卽進之供奉宋則趙莊叔對策第一稱天子門生皆在
人耳目間也今諸生斐然稱上國之觀不可謂不遭時

矣如前數子得無饒爲之哉不佞又聞之劉夢得云鎔
範之內無非祥金蓋爲關中韋郇公言也今侍御公主
持文柄遠勝郇公觀是編所輯可知已第願諸生不讓
鄉先哲哉

林衣集

卷三

八
四明叢書
約園刊本

林衣集卷三

林衣集卷四

明慈谿秦舜昌虞卿著

贈序

贈觀察楊公初陽先生治兵海上序

公旣以治平奏最當遷者屢矣會巡海使者闕郡邑士民盱衡而呼曰必畀我公幸得久怙公也已銓曹果以公名上而屬當上計諸士民意公可無行公毅然曰此臣職也臣惴惴焉待命之不敢知而敢有他覲於是公遂行則又以治郡第一爲計吏最而巡海之命下矣諸

林衣集

卷四

一四明叢書

約園刊本

士民聞而喜可知也凡臬使者持節率多治兵而寧鎮三垂枕海與島夷爭陽侯而治實全浙安危之門視他鎮特異卽郡太守得受命副臬事亦屬恆調而公獨遶牙故郡玉斧彤鉞之靈不移鎮而式臨之視他擢又異其在四履自浙以東列城以十數文武將吏以百數蓋孤長鬣之羣以千萬數而獨吾郡故以祖事公也今進而曾高矣分彌尊德彌厚視事他使者則尤異蓋一郡五屬邑之氓無不歡呼相慶而下邑之最近曰慈谿慈薦紳先生相與移書不佞徵文以賀不佞自頃歲里居

習公政最詳被澤亦最溥卽欲有言何敢先諸長者無
已則質之縉紳之在燕中者僉曰公治仁聲四訖其清
靜寧壹之理於海內寡二矣茲莅政必且大更約束易
置將吏赫然以剛稜風采聞賢者固不可測哉予曰唯
然有之不佞向頗習掌故家言吾郡前爲太守最著仁
若寇侍郎公天敘爲兵使者最著仁若譚司馬公綸寇
公治郡嘗稱愛民如子處事如家汔後經畧邊鎮惟鎮
靜持大體譚公秉憲雖不純任寬然沈渾博大不爲苛
小刻厲其往蹟章章可考已故文武無二道張弛不殊

林衣集

卷四

二四明叢書

約圖刊本

軌漢稱吏治不以延年之武健先次公唐稱治軍不以
臨淮之震疊先汾陽何者天下事治辦易鎮定難也今
國家不爲無事矣疆場之任一彼一此余每見今任事
者不患不敢決患不使晰利害不患不喜功患不持重
當機公爲政大指約畧如二公無疑矣然淦水惠澤及
民固無論其節鎮之功不在東海襄毅當島夷猖獗時
勳績獨茂其初固未嘗得拊循父老子弟也今公以淦
水先以襄毅後蓋二公所不能兼者合併而迭用之其
於鎮定東海寧有涯哉且公未授節鉞海波恬然者已

三年矣今寄憲臬之重卽以治郡者治兵又寧有異道哉抑又聞之寇公在西陲時御史請進秩撫陝以耐經畧之勞譚公爲本兵每對客言念未嘗不在海上也今縣官方急才有足任邊圉者輒不次超拜公茲莅鎮如天子終惠顧東南後三年而寰海上成勞尙亦有開府在於斯時也則又爲寇公更後此入典樞柄身係天下安危猶不忘吾郡於斯時也則復爲譚公敷歷循環以二公終始此真郡邑士民所肝衡稱慶意也不佞不嫻於詞以耳目所睹記竊願公如此試以是質之薦紳先生其亦以爲頗有當否

林衣集

卷四

三四明叢書

約園刊本

送司理周使君應召入朝序

使君之爲理蓋莅明越兩州云而其後先莅明越也又代兩太守治故其聲績最著惠澤及於民最渥諸章縫之士被教思亦最廣輿人之誦云自有司理無論全浙於海內無兩矣當使君之初釋褐理吾郡不佞某一再承接則見仁心爲質中坦而外詳卒遇之喜怒不爲動屹然有古大臣風其爲政神明洞達可使伏匿無遺照然不欲訶刺毛舉取察察名見文法能輒取雖老吏莫

敢上下然多所縱舍不爲深文峭刻遇事能立剖斧斷
理解靡不中窾會然務與民休息不爲紛更燹革以敏
給自憲也蓋使君之治可二年而諸父老子弟無不人
人加額曰真吾慈父也他史胥宿猶若里中豪惴惴幸
毋敢撓法曰真神君也博士弟子員進而受教退而欣
然意得曰真賢師也而亡何適以憂去環一郡五邑之
眾無不人人號呼狂走軼行車不得則相與旦夕司使
君闔海之濱以爲庶幾異日復師帥我也比服闋則旦
夕司山公啟事之書以爲當宁復予我使君也已聞越
州之命則且悲且喜謂縱不得使君猶及芘宇下矣而
使君之治越壹如明越人之誦之壹如明父老子弟卽
明父老子弟仰怙使君壹如異時坐堂皇之上且夕受
教令時也今歲己未天子旣大計吏殿最有差使君旣
用卓異聞復有詔更遴司理邑令之尤異資及格者備
臺垣法從之選則使君首應詔當入朝於是諸孝廉某
某輩皆使君所舉闈中士也相與徵不佞一言以先乘
車不佞故不文無能爲役然被沐膏澤熟於使君之政
久矣而長兒某往從諸生課藝中辱使君首拔之今幸

復出使君門下卽仲兒某亦得謬廁諸孝廉後受知特
深何敢以不文辭伏念今使君行矣行則必列諫垣稱
禁近耳目之臣還視郡邑不啻層霄懸矣將操何術以
往哉不佞嘗竊歎人臣受職內外崇卑殊要以精白一
心真誠體國無兩也遠弗具論閒考宋名臣勳業茂著
身繫天下安危若呂文靖公夷簡韓獻肅公絳其始皆
爲理官識者已知其爲宰相器而當時人主之信之不
在執政之日而在爲潁川爲開封時矣今天下自不乏
名司理亦不乏名諫議然當其鷹擊毛鷲自矜執法糾
彈絞訐自負敢言吾不知於庇民福國何如也使君仁
心爲質其聰明才畧可無所不擊斷而特以寬和博大
聞慈不失姦厚不失法不佞向所謂有古大臣風者也
使君行矣用此而司理無所不得民卽用此而司諫無
所不得君端於此行券之哉今使君蒞明越明越之人
誦之如一公之任潁川開封無疑也異日自掖垣而上
日益柄用任鼎樞統均之重知必爲文靖獻肅無疑也
不佞樵不文敢謂能盡知使君以昔賢之知二公於理
官知必取券於使君又無疑也諸孝廉曰善請書而載

之乘車

送邑大夫巴西向侯入覲序

國家振飭吏治率三年上計用周官法殿最之天子臨軒褒表卓異以次引上殿賜大官法醞及不次超拜或自令長擢給事御史典最重云蜀向侯莅慈之四年復當入覲邑薦紳先生及諸孝廉賢良文學之士念侯待徵日久是行也必在披垣無從且暮觀繡袞九或鴻飛之詠謂何則並以言屬不佞不佞謝不敏竊覩侯治行澤在蔀屋歌在康衢績在考功之牘夫人而能言之無

林衣集

卷四

六四明叢書

約園刊本

論不佞詞不工又何敢先諸長者無已則請徵之民曰鄉三老數十輩謁不佞曰往者庚戌之役幸得請於部使者辱留我侯至今猶一日也今侯又復行不獲終庇宇下矣卽不敢效漢河內廣陵故事乃民則猶吾民也昔胡得請今胡不可且赤子怙慈母乍奪之則戚久而奪之則倍戚今正民倍戚時也先生何以寬之不佞曰輯玉肆覲上以尊朝廷下以肅臣紀禮莫大焉非疆圉之故歲時之不若孰敢不其自侯莅事東海之波鼉屨不揚四年於茲矣歲比稔公私之庾殷然山積父老卽

欲軼侯何以爲詞矧計吏之典舉一而勸百堂陛之交
用邇而風遠我皇上英明獨斷往往出人意表比者臺
省之命沛然渙發以寓內延頸數年一旦歡呼踴躍頌
神明不測今六服羣工鱗集輦轂下皇上亦且厭深宮
邃密特御明堂朝萬國延見大僚問政治得失次及親
民之吏究所疾苦舉蓼蕭湛露盛事褒表卓異則侯其
首也推擇耳目風紀之臣充臺省復煥明旨則侯其繼
也夫旌一侯以厲百職侯一居禁掖以全福天下將在
於茲豈惟吾邑不終芘宇下哉三老慤然曰先生言良
是野人不知廟廊大計第言畎畝之私抑侯莅邑如甘
雨焉朝以施則朝受夕以施則夕受異日望侯在九天
之上卽慷慨言生民利病膏澤所出不知視今日及民
幾何不佞曰不然爾知天道乎天之生物使雨司浸潤
雷司震動各效其職而相爲用雨霖霖則瀆入傾注則
旁流然霽靄所不及卒鮮潤焉雷一作而勾者達蟄者
起鬱者舒虛空所鼓百昌立蘇是以無及爲無不及也
故解之象並取雷雨而雷之用尤神今侯雨一邑四封
之外其及有限異日列紫垣之內則司震者也用今日

所試灼見而極言之豐隆所動宇宙沈陰鬱決之象廓然頓開弼成皇上百年更始之治使含生被澤更捷於身試之卽慈民永賴焉況侯終不忘吾慈也於是鄉三老欣然慊志而去薦紳先生曰聞公斯言豈惟慈民卽東人九莖之慶予自今日共之矣

贈郡司農林公署篆慈邑序

清源林公始佐吾郡郡大夫輒爲題輿表雅望諸屬邑仰見屏篁皆嚴重與太守等屬有權關之役則商旅歌於塗主上賦則農民歌於野已代校文之柄一時矜裨

林衣集

卷四

八四明叢書

約園刊本

譽髦之士人人歸水鏡焉蓋葺年而循聲奕奕出諸郡上矣適慈令闕監司及中丞臺念非持重通敏練達大體者莫能治慈則以公署篆事葺年政平訟理邑中歌呼誦德更什伯於前曰安得長留我公惠吾慈也會新令至公還郡事父老子弟旣無計攀轅然猶及芘宇下翼公終不忘吾民而薦紳先生亦競爲歌詩志輿誦於是邑博士松陵某君天台某君樵李某君率諸弟子員造不佞微言不佞辱在編氓何敢以不文辭蓋嘗歎吏治之難非直才具少也大都傳舍其官而故紙尺一屈

指歲月冀得代遷以去耳其在署篆則更以爲固然吾受事而有所振刷未幾而委其柄去則以暫故弛吾事成以其績予人事未成以其咎予已則以臆計弛且人情事不責躬孰取其難勞可轉貸孰甘其瘁有不媮取自便者誰乎則以幸得釋負弛故署篆而靳悉民利病實心任事百不能二三勢固然矣乃公之署慈獨不然公爲人坦易宜人情洞達幽隱旣明習吏事而壹以經術潤飾之初莅邑覩學宮圯輒慨曰是何以廣厲教化育才賢稱首務哉邑事雖劇孰有急此者卽捐俸斥贖

銳庀材鳩工埽歷年之朽蠹而更新之令邑人復瞻廟貌功最偉云公夙以文章推重閩海尤嚮意文學謂邑有子弟而廢課程不舉疏俊彥不錄師帥之謂何則進諸生親試而甲乙之其持衡務根本六籍與彈射得失覺覺不倦也夏秋亢旱四郊如焚民皇皇靡掾公徧羣望徒步赤日中歷長途僕僕亟拜未始告劬不旬日大雨如注歲復有秋農民歡呼加額謂公精誠直令天雨粟也而是時公方病瘍古稱憂民至痾瘵切身而公不知痾之在己尤難之難矣公善政種種未易枚舉大約

民取休息事取理解賦取完額訟取息爭民麗法者未始屑屑窮竟然義所不可雖暴豪桀點撓之不爲動論者謂公外寬而中毅有古名臣風焉不佞嘗覽史稱士元非百里才使處治中別駕始展驥足謂非通論夫別駕視令誠尊何至視縣事竟以不治世有優治郡難百里者哉公惠臨下邑不難抑尊重親煩劇非獨其才饒爲之其實心任事悉民聞利病視士元不啻過之今當寧慎用人署多闕員令署篆盡如我公卽無變代庖廢業令人人任職如公署事又豈有冀旦夕遷代媮取自便者哉昔王太保休徵方爲別駕時輒有佩刀之兆復與其弟覽曰後必有興者其子孫遂貴盛累世爲江左名宗今公旣有子上公車公爲德於慈若此知公奕世多才賢當不藉虔刀爲券矣

賀大觀察洪公亨九先生擢江西副臬序

公之初奉璽書董浙學也掄才則歸水鏡章教則尊法矩其激揚風紀則江海砥柱而士林斗杓也而於不腆下邑弘獎諸生又特甚卒用魁解額蓋寓內推師儒名哲未有兩也會巡海兵使闕當寧推文武爲憲足任鎖

擒者宜莫如公則又以憲節鎮海邦蓋重寄也先是吾
郡援遼之役卒驕蹇不受令勢且脫巾而海上亡命剽
掠無禁寢寢闖入內地憂叵測已公以廉潔風厲百城
吏士無不洗心奉約束則申令卒伍受餉者月按籍指
計而分給之無愆期無貸手凡鞅韋而弁者無敢腴索
子錢家無所取倍息人人踴躍用命士宿飽矣將自偏
裨而下爭自淬礪拊循其部曲無庸巧取行媚以希眄
睽一時債帥屏跡矣以其閒遣戈船下瀨之士擒劇盜
縛其魁十餘人懸首藁街餘黨亦脅息遯去鯨波頓戢
矣屬亢旱則躬虔步禱爲郡邑先甘澍立應歲復稔農
氓樂業矣蓋莅鎮才二年而外之剝牀者皆覆孟也內
之跋扈者皆安瀾也儲胥之瑕釁者皆堅壘也自浙以
東亡不籲呼加額願公遂開府全浙屏翰東南得長有
寧宇而適奉命晉副臬鎮豫章於是諸將吏士民又亡
不籲呼狂走以不獲攀臥軹公行爲恨不佞某往歲嘗
承乏鎮九江雖號稱雄鎮然不若東海爲尤重憲副雖
尊顯於公第循資擢非破格超拜酬殊績也且復用治
兵胡不仍故節終惠海邦以觀三年之成更若何而重

煩前驅僕僕也既又念公成進士時年最少去爲諸生
未五年而儼然爲全浙師其莅浙未四年而左敦詩禮
右統弢鈴隨試立效則天子之所以用公與公之所以
見才良最捷矣今以海濱乍定業有成勞故暫移之內
地俾小逸之其自憲節而上彤弓朱鉞游錫而重寄之
由前事以觀固且暮閒耳不佞故聞公之鄉具文武才
以清節著者亡若張襄惠公岳嘗董浙學留參藩尋以
中丞撫江右而公且自江右還撫浙先後兩公風裁名
節絕相類而宦轍旋轉亦復如環不亦休哉矧公春秋

鼎盛勲業日隆視襄惠當踰勝之矣不佞持是說話諸
薦紳皆曰君言良是然公家初章先生亦自學憲莅節
鎮固以是爲世家而吾儕得世徽宇下子弟亦世爲公
門桃李其終惠海邦豈惟今日予日望之矣

賀邑侯雲間李若鶴先生奏績序

公之甫下車也則以精敏習吏事洞哲民隱翕然稱神
君矣比三載當上計邑父老旣不忍且夕釋公而兩臺
念濱海巖邑非賢令誰爲砥柱全浙者特疏留之又闕
歲當奏績兩臺覈公治行宜爲天下第一所推美薦揚

備至又特疏留之於是邑父老喜公之政成也其被澤深也今奏最天子特下璽書褒崇卓異其勲典渥也相與歡呼鼓舞競徵文以賀而不佞故從雲間辱公知膏澤最渥子姓又辱公陶鑄稱門下士能無效一言之贈今天下不乏才賢亦不乏循良之吏然當其爲政新各任其才識之所至或嫗煦閭左取慈惠聲未見德而因以長姦或摧抑右族取風厲聲未見威而因以駭俗或孤立行意取伉直聲未見節而因以滋戾此其治皆欲攀攀高自表異而其效若是要以妙張弛之運酌寬猛

之宜機權在握而非任臆攀畫宜民而非徇情則未有若我公者也公風裁凝重屹然嶽立而坦衷慷慨使人人得自盡雖田庚禍暨對之未嘗峻聲色而人不敢欺接士大夫逡巡禮讓然不可干以私邑土瘠而民貧長賦者或藉手猾胥姑隱額以爲逋地公鉤稽夙蠹劑其賦額而什一分之限輸其一毋得參差上下不假雄扑而歲課畢登訟牒紛如出片言立折其奸然時有縱舍不欲窮竟於法訟庭常虛無人屬當編役十年爲計人思巧營以自脫而公已豫晰人戶高下里區殷耗狀參

輿論衷之不旬日而定而他邑至累月猶未竟公夙以文魁南國其衡鑒不失絜黍每試鄉社子弟彙筆亡慮數千人公日理案牘應賓客無異平時而以其閒校閱若象罔無憾遺珠卽奚落者得公評隲皆心折去而又時時蒞學宮進諸生談經課藝人文蔚起遂以解額冠全浙會接遼之役狂卒揭竿至白晝行剽一郡皆震公密憚其裨校令銜枚過慈邑秋毫不敢犯越鄰壤輒騷然矣公他善政種種悉數之不能終物其躬自節嗇食不重肉燕不過五簋雖重客無加籩至有廢必舉有利必開有奸竇必剔敗羣者必翦胥篋之盜必戢而比且留心邑乘詒千秋不朽之業他可知已蓋公治三年而問之窮簷皆冬日也其於市魁宿猾皆嚴霜也文學衿禱之士皆時雨也薦紳大夫挹公之言論丰采皆光霽也今聖明更始吏治蒸蒸卽寓內多才賢度亡能異公指稱循良卽稱循良度亡能軼公而上者今旣奏三年績天子徵治行高第必首召公語云宰天下亦如是公用其治治慈三年可百世利也卽用其治慈者以毘天子爲國家剖陳利弊糾飭官邪不競不絀不剛不柔建

萬年中和之極有異今三年者哉不佞不文請持是言爲他日券

賀定邑侯長洲顧巖叟先生考績序

公之始成進士也其文傳響藝林若麗雲漢而垂琳琅藝林爭購得之卽予邑操觚之士亡不人人誦習奉公教猶在門牆也已受命令蛟川與予邑錯壤而治其流膏四溢若東海之注百川所在濡沫慈民之被公賜猶在宇下也公治未幾輒以卓異聞直指使者推轂治行必舉蛟川第一比三年當奏最定之薦紳先生及賢良

林衣集

卷四

十五 四明叢書

約園刊本

文學競徵文以彰殊績卽予邑亡不人人踴躍思得當以昭輿誦猶在編黔也不佞自放田間不復與聞當世之務亦不復以筆札滓人耳目唯是在野言野公之善政里中父老能言之則以頌言屬不佞不佞既不獲辭則念定邑枕海而城爲全浙砥柱國家置大帥宿重兵鎮之與民居錯中丞臺歲以春季行部遣戍戈船下瀨之士諸所調劑供億率倚辦令故他邑治民定兼治兵他邑治賦定兼治餉他邑斤治疆域之內定所治直出鯨波島嶼之外故定令難令於今日之定則尤難予

不能悉數公之善政姑舉近事所棘環海所虞者言之
先是援遼之役悍卒驕蹇予之餉小不慊輒搨竿起勢
且震鄰以公廉明什伍素警服徐出片語慰解之竟頗
首受約束去當是時事起倉卒非公復作涇原脫巾矣
海上亡命實繁有徒剽掠賈舶無算駸駸闖入內地公
嚴詞刺摘發如神卒睥睨不敢動而比且駢首就縛海
邦幸有寧宇非公又復作會稽水仙矣定故斥鹵厥田
下下民歲入不能供賦額自軍興發摻括苦不支而比
以黔稅至爲罷市公特捐月俸佐之民感激羣然樂輸

林衣集

卷四

十六

四明叢書

約園刊本

非公又復作楊可告縉矣凡此非能盡公政然皆近事
所最棘緣海最剝膚者公咄嗟辦之卽鄰邑與被其澤
豈惟定他若興學造士折獄戢姦虔祭雩恤孤惇斷利
弊種種善政定人能詳之無俟予言至其清標絕俗嘗
權闕不染一塵則楊伯起孔君魚常事非公所難以是
頌公淺矣今聖明更始吏治聿新度寓內循良高第亡
能軼公而上者奏績宜爲天下第一天子下銓曹覈治
行獨最需次徵召備掖垣法從之選其誰能先公哉不
佞言無能重公竊念公之先世爲江左名哲若德望則

尙書令元嘆風節則常侍彥先博綜則黃門野王治行則山陰令凱之今公奏績直以長康始自茲以往當不啻兼前數公而上之洵公家多名公卿哉

賀郡伯楊公擢巡海兵使序

在臬使者持節治兵則邊鎮重而寧郡砥柱東海屏蔽全浙其重與九邊等故浙之治兵海上爲節鎮者三而吾郡尤重兵使者闕內非諸曹卽積資著聲實者不得遷外非太守高第及藩臬遞轉負重望者不得遷其自吾郡守輒授節鉞開府其地前此未有也自今楊

林衣集

卷四

十七

四明叢書
約園刊本

公始公爲人醇厚豈弟外寬而中辨與人恂恂無論薦紳大夫下至閭左氓隸無所得公峻辭頰色而又雅好文學其獎拔士類藹然若家人父子孳孳不倦其治務崇大體畧苛細要於吏事無所不精覈而不必窮於才於訟獄無所不剖決而不必窮於法於諸曹蠹穴及他奸猾無所不搽剔而不必窮於察談者謂公廉潔如劉會稽利澤如張漁陽清靜如尹東海至先教化後誅罰獨用寬和爲名則潁川次公而後一人而已公旣奏三年最當遷而先是兵使者以海氛故多移病去天子難

其人中丞直指至坐名以請不得銓曹以爲莫如今守
良遂報可蓋聞命而父老子弟相慶曰幸哉終惠我公
不煩借寇也則躡躍喜將自大帥以及裨校相慶曰公
故嘗翼庇我今不移鎮而受憲令如日之照有私暄焉
則又喜兒整組練戈船下瀨之卒相慶曰吾屬者宿飽
而嬉疇乳哺我此其節鉞新而覆疇如故也則又喜而
公同年友芘宇下者爲咸仲張君孟博韓君其喜更倍
於父老子弟及諸將士則馳使數千里緘書布幣曰以
不穀之夙奉公教佩澤深且有大道於子姓也亡若中

林衣集

卷四

六十四明叢書
約園刊本

藏之而不能吐也敢藉太史氏之一言以爲公賀蓋不
佞之辱在宇下與二君同而頃自闕庭伏覩公以治行
高第旌已親奉璽書乘六乘傳以往竊津津豔之其喜
更甚於二君又惡能無言則嘗竊觀自古國家用人其
必爲才賢固無論然必人與地相習而後其績彌隆下
與上相習而後其澤彌厚卽在宋若張忠定公自知益
州其勳業多在蜀而爽之分陝至歷成而康我國朝如
周文襄撫江南至進爲尙書垂三十年今天下不乏喜
事躁動之臣輕國事於一擲勢不得不更易而國事固

未可知也若遼左其前車已吾郡固重鎮也而今疆圉多故島夷不無生心則其重尤急誠得公之重以寬和博大坐而鎮之而且習熟鎮事視環海而戍者諸要害雖在鯨波數百里外猶堂奧也視諸將吏猶家之亞旅也視卒伍猶其故拊循之孺子也而又益以錙鼓幢纛之靈何所不便晰何所不輯寧不佞卽欲有言更何所願公第願廟堂之上得久借公須之歲月或增秩賜金仍故節治兵自如如垂崖之於蜀勳業當益著更進之旬宣俾南國之歌猶召芟焉又進之以中丞鉞撫綏吳越如異時周恂如故事將全浙永有賴哉則豈惟吾郡自今以往爲浙寧人得公恂足賀也如第以一兵使者賀公無庸贅矣

賀鄞邑侯沈公奏最序

當公之始莅甬也以子奇之齡擅賈生之文其丰儀又翩翩河陽也一時三老子弟翕然相慶曰異哉仙令其造福當不淺矣比視事則便晰利弊迎刃輒解若習名法而老簿書者雖史胥宿猾亡敢以疑事嘗則又懔然驚曰異哉神君邑自是有永賴乎蓋不數月而流聞浙

以東西於治行無兩矣不佞方于役河漕不獲旦夕承
字下然客之至自甬亡不嘖嘖令公之治不容口大要
謂公豈弟詳雅乍卽之坦焉無崖異而中有特操其政
務與民休息不爲鏗急取治辦名訟取平亭時有所縱
舍至桀黠巨豪法無貫賦取充額卽鞭蒲若可棄置然
巧胥蠹穴錙銖必剔焉造請賓客取披見情愔逡巡退
讓然不可干以私律已取廉潔不靳刻厲標戾俗聲然
筐篋之使亡敢闕入雉門者而其雅好文學時進子衿
之士彈射藝文津津不倦都人士亦亡不人人意得謂

林衣集

卷四

三四明叢書

約園刊本

塾師擁皋比受丹鉛不是過已蓋公之治三年而四民
樂業百廢具舉環視壑畝熙然其中牟與視澤宮煥然
其禮殿與闕并穆然其竣儀與不佞聞而喜可知也於
是歲之庚申秩滿當奏最邑薦紳先生及賢良文學靡
不頌言以志輿人之義而諸孝廉輩皆公所舉闈中士
也其人不必盡爲勤然其爲父師均也相與徵不佞言
不佞念公治行夫人而知之亦夫人而能言之今上績
書考功天子且渙恩綸錫馳典王言赫奕何所藉不佞
言雖然諸君之受知于公者文也不佞姑略公之政而

論其文夫文章政術有殊用無殊體今天下文章之變極矣譬之政其爲刻深詰曲卓詭不倫使人見之矐胎者則亦文之鷹擊毛鷲也其爲洞朗瑩粹元氣盎溢使人心神怡曠者則亦文之祥鸞神雀也予冀得公公車牘讀之大都根柢六籍澤于爾雅雍乎郁乎金玉諧而雲霞蒸也今試諷其文絕類其人覩其政絕類其文諒哉文章之道與政通也遠弗具論卽近代文章典雅爲世宗工必首廬陵其知貢舉當世能文之士比比出門下然概其生平令夷陵則稱循良知諫院爲右正言則

林衣集

卷四

王四明叢書

約園刊本

稱伉直最後居政府弼成慶曆之治則稱詰輔故永叔文人也其服官莅政卽有宋諸名賢赫煇勳業未有能險勝之者諒哉文章之道與政通也今公旣奏最天子且下尙書尺一徵爲掖垣法從之選異時慷慨上封事如麟州忻代之議以固圉馭黠虜商湖六塔之議以深識折河患此皆國家今日最急務也能無披瀝言之乎卽無論公後此鼎柱之業更何若斯亦何渠遽遜文忠公哉諸君業受公知亦尙思文章之變克廣而善用之宜不減廬陵門下士矣

賀參藩楊公以邊功奉詔晉秩序

國家威靈旁鬯四裔率俾頃虜酋復款關受封賞保塞如初天子嘉邊臣後先勞績制詔主爵自督撫而下以次增秩賜金有差而楊公先是備兵塞上有綏靖功則自今官加秩副臬蓋明主重邊計紀勞臣甚盛典也於是郡太守某君暨僚屬某君謀爲公賀而屬不佞致詞不佞竊歎公資望深重於疆圉最著往自司馬尙書郎主邊餉已持節鎮雲中諸縉紳稱明習邊計未有出公上者令今日尙在邊鎮授鉞建牙又孰有越公而前者今

林衣集

卷四

三三四明叢書

約園刊本

茲秩直公所固有未足賀公不佞所賀有關國家大計者三而晉秩不與焉國家所甚重急才賢無若九邊而邇來聲實相左上下相匿亦無若九邊甚今以名王內附天子綜核功實劑高下稽久近有勞必逮若燭照而衡量之使邊無虛冒賞無虛額肅疆圉而尊朝廷此爲大計一主上慎用人銓曹啟事率遲迴不下或更歲月今渙然下明詔褒崇封疆之臣諸爵秩采廷議斷自上裁令行如流使天下知明主賞罰必行無虞釜鬻此爲大計二人臣負才愚不及樹功樹功患不獲受知知矣

又思持短長者齟齬之公先是三晉功最著偶以他語
量移內地今離鎮數易歲再易官功狀益白天子不率
浮議不泯成勞卒以優敘使忠貞才略之臣咸濯磨自
奮發策勳報國廣折衝禦侮之績此爲大計三是三者
固不可無賀然非爲公一人賀也太守曰先生之論偉
矣蔑以加矣然某等屬公宇下祇奉憲令幸毋墮厥職
更謀所以賀公不佞曰子聞公太公常持節鎮東粵汜
今康壽爲國元老公早歲以文章世其家嘗分校浙闈
典試巴蜀宇內方仰公若眉山父子而明詔所褒復用

林衣集

卷四

三

四明叢書

約園刊本

武功邁如天子復西顧而思安攘之烈念公歷藩臬旣
久旋授中丞鉞以修疆場之功山斗干城並萃一門俾
邦家藉有世臣爲泰維重不綦盛甚休乎哉是可以賀
公矣

林衣集卷五

明慈谿秦舜昌虞卿著

雜記 雜著

重復杜白二湖碑記

慈濱海巖邑也地瀉鹵厥田下下秔稻之利惟水泉是資其東西南襟帶紆江支流足自潤其北鄙爲鳴鶴鄉當勾餘之交肘山而背海蓋江流所不能通焉古有杜白二湖受眾山之水以資灌溉溉田可萬頃自昔稱爲二天利可知矣杜湖廣凡三千七百畝白洋湖廣凡一

林衣集

卷五

一四明叢書
約園刊本

千七百餘畝上下二區互以金隄爲礙爲閘以時啟閉旱潦無虞鄉稱殷庶而並湖諸豪窺湖田之利時穴其隄因淤爲田湖日塞灌日阻淫雨卒爲汙稍亢陽則赤土矣先是邑大夫往往釐正無慮三令五申載復載阻鄉人訟牒如山至曉曉相格鬪以死而莫可竟邇豪家且以利蠱上官借籽粒佐賓興覲因爲永業用塞言者口當事者牽於小利莫能一割蓋弊所從來矣歲庚寅太倉黃侯甫下車問民疾苦狀鄉三老羣走控於庭侯慨然曰利百則法必守害百則法必更畜瀦之與淤阻

利害奚啻百十且稱名籽粒不可訓矣柰何以一鄉之
務官授之柄與豪爲政哉爲曰其狀於中丞臺御史諸
監司俱報可則之部趾履湖山之麓量侵田廣狹定以
尋丈約以期日盡復二湖之舊令諸豪家不得擅攘自
封蓋自唐刺史任侗宋吳潛浚築而後復覩二天侯之
功誠鉅矣昔李栖筠復鄭白二渠毀水磴以灌萬頃孫
曼叔禁竊渠黠豪致萊畝率成沃壤二子者傳所稱慈
儉吏其始未嘗不犯怒速謗迨其後而守約束不忍弛
也侯今用人和完地利跡因于前而功倍于初其情歡
豫不俟異日以公視二子不亦遠乎是役也垂永澤以
惠祉積蠶以義燭利害以明奮獨斷以任輯強梗以和
一舉而五善備焉侯他善政多類此不具論記所以復
二湖者如此斯父老請命于監司意也非我侯意也侯
名某蘇之太倉人萬曆己丑進士

儒學修衙碑記

國家建學儲才崇師儒敦禮教蓋重地也慈邑自權兵
燹學宮多草創自殿閣堂廡而外他無所貯掌故卽祭
器亦無專藏寄衙署陋室中有專則設已則置焉而署

更湫隘故撤廢材構之歲久而圯先是任博士者苦不蔽風雨然亦遽廬視之不欲割橐裝治也歲壬辰姚江呂君以待次公車署教事始至諸生以贄進君謝曰予不佞無所辱諸生爲也諸生固請曰不腆羔鴈敢以是溷我師乎固禮也於是君諦視諸生貧者悉歸之餘不能卻者數十金殊不欲自有之也則仰屋詫歎曰是類然者以居師儒何陋柰何委籩豆草莽哉卽承做龔蠶易去耳何以春秋修吾禋事於是出贄金及捐廩祿之餘庀材塹瓦繕葺焉廳事前左右个相偶塗蓋惟謹度

林衣集

卷五

三四明叢書
約園刊本

俎豆其中左臧案牘後爲便房庖廡更置楯欄易棖檠煥然一新屬不佞記其事予惟公家之務多所廢壞非盡力不能任類苟且旦夕媮自便耳故功無論修搆慮遠則巨費無論多寡捐己則難君爲人坦易嚴於大體義所不取一介不渝尤慷慨任事動依名節本之忠誠不爲粉飾媢媢之態卽是役也尊祀典以禮裁贄幣以廉善居室以惠成遠慮以信四善具風厲廣矣他如建射圃於南面還倉舍於西隅畜泮池之魚水闢文昌之廟門所以飭宮牆培風氣甚厚不具述著所爲修衒者

如此以俟後之君子有所考覽而興起焉是爲記

舉中丞張公楷寇副張公昺祖孫鄉賢文

爲公舉功德懋著崇祀名賢乞賜轉批以式鄉閭以重
風教事本縣永樂甲辰進士歷任南京都察院右僉都
御史今祀鄞學鄉賢張公楷筮爲御史以糾彈著風節
總督閩浙有勦寇功勳業文章詳小傳中伏念本宦才
兼文武勳績累著旂常學究天人著述博綜經史直節
蚤伸于柱下人驚彙筆搖山神明洞燭于覆盆世頌燃
犀照膽掃猖獗之巨寇八閩兩浙至今猶莫安瀾樹安

林衣集

卷五

四四明叢書
續園刊本

攘之宏猷三輔九邊到處均垂永賴所最難者功成身
退羅護六七載絕口不道前功尤可重者殉國忘家歷
仕四十年終身不問生產至其羽翼道脈如四書標批
易禮正要等書真可鼓吹六經赤幟詞壇如詩賦雜體
武經小學諸作並堪雄峙千古試擬壯猷于周室足班
方虎之儔俾參文學于聖門庶幾游夏之列成化壬辰
進士歷任四川按察司副使今祀府學鄉賢張公昺清
操絕俗爲政精通天地化行異類以直道忤時致仕歸
窮且益堅晚節愈峻異政廉節詳小傳中伏念本宦貞

介可摧金石精誠真格鬼神雪獄婦之沈冤竟揖明神
于白晝燭寺僧之淫惡遂感蛇孽于當車正氣塞兩閒
坐令猛虎伏辜淫詞竄匿成千古勗見之奇剛腸堅百
鍊卒使妖巫碎首叢神剷跡殄萬姓沈迷之崇迨南臺
抗疏而力折權璫汙副臬賦歸而家徒立壁方菽水之
未厭唯圖史以樂飢荒而卻振致令中丞不得以餽問
加恩義不受餐直使邑令不敢以銜環語報至饜寒數
日而投珥之志彌堅縱身歿千秋而茹檠之心如在若
嚴一介于莘野未或過之令追孤竹于首陽真無愧矣

林衣集

卷五

五四明叢書

約園刊本

舉湖廣方伯馮公叔吉鄉賢文

爲公舉名碩鄉賢以崇祀典以重風教事本縣已故嘉
靖癸丑進士歷任湖廣左布政使馮公叔吉天倫篤摯
風節稜層敷歷三十年勲業每徵于畏壘林居二十載
齒德久重于鄉閭筮宰泰和窮盜藪以絕禍原摘發眞
同虞詡繼守池陽務振施以起溝瘠救荒不減富公其
勗立江防則戈船列戍長江千百里至今影戢萑苻其
奠安畿輔則禦曠屯兵徽寧諸郡邑到處民安桑柘疏
三吳之水利如長橋七浦諸役猶歌永賴之功覈楚省

之田糧如飛派藩祿等弊咸服精明之治至雪猗氏卜
俊之誣出銅陵孫氏之獄頓甦大辟于沈淪擒雲間越
獄之盜定休寧激變之民立止亂萌于呼吸若乃力折
權貴如扶歐少宰桀黠之奴令移書致謝抗殷司徒絲
絹之議致擊鼓登聞可謂執法如山折節才賢如識蹇
少保理吾于下僚特爲推轂矜矜孝廉九思于文網亟
與昭蘇可謂好賢若渴迨夫敦倫尙義尤足厚俗維風
事父八旬凜嚴訓猶然孺子喪弟早歲撫遺孤何啻屬
毛終制居廬壹屏公庭之跡分財振厄每勤宗黨之施

林衣集

卷五

六十四册藏書

約園刊本

賢賢則助田學宮盛事倡百年所未備親親則聿新祖
廟仁風聯九族而無遺當儉歲而平糴粥飢拯萬靈之
待哺值曠使而調停酌議免一邑于剝膚他若遷縣治
修邑城梁江門輒先捐貲以成大役建義冢施棺衾助
婚嫁尤急傾橐以恤孤惻方二子成名遂折券棄負復
減租以惠農及壻姪偕顯益掃軌杜門更循牆而應客
卽其衣無重帛室無二姬泊乎有君子恬淡之風言必
慷慨行必激昂儼然得天地剛大之氣蓋生平文章政
事歷宦轍雅擅二長汜沒後頌德歌功于士林可稱三

立在学校無忝鄉賢況池陽已祠名宦據彼移文本府
與古召伯之思千餘載如一轍再闢志中特傳自唐崔
衍而後三百年惟一人尤公道之可憑而實錄之有據
允宜崇祀以光俎豆以式鄉閭者也

林衣集

卷五

七

四明叢書
約園刊本

林衣集卷五

林衣集卷六

明慈谿秦舜昌虞卿著

詩 在長榆時作

苦寒行

長榆北枕獨河曲野無青草肌有粟白日偏攜陰氣升
未冬持斧斲層冰一夜凝霜綿盡折階前有石如紙裂
胡兒半死泣重氊宿鳥辭巢入深穴嗟予越客棲荒園
如聞白鶴當年語安得葛翁口中嘘安得漠北來礪鼠
主人愛客興偏豪常于深夜醉葡萄應知戍士眠甌脫

林衣集

卷六

一四明叢書
約園刊本

尺玉不貪貪短褐

塞雁行

連翩胡雁辭連海西風陣陣渡關壘長空一飛復一鳴
只恐參差相失輕及至南來煙水闊歷亂菰蘆紛播越
恰于夜靜宿江浦遠得風波親網罟月黑驚飛何處棲
熬熬莫訴離羣苦好乘春雪卻飛還歷倦千山與萬山
只道胡兒凍欲死猶覩瑠璃弓急欲彎

古別離

珠絡明光帳蒲桃合歡綺深閨獨掩扉愁心日千里只

言人去似飛蓬誰道蓬飛在鏡中春絲歷亂空機杼夜
香零落冷薰籠幾憐明月當朱戶寒光不到陽關路幾
怨淒風蕩繡幃狂吹不逐歸帆度惆悵年華屢改更且
將消息付閒情待得新來風景換畏說庭前春草生

人日坐月

雪浣春初月清光共我圓已能相伴飲何忍獨爲眠一
望晴空千萬里冷浸衣襟情未已坐來寂歷悄無聲客
心此際清如水不知塞上幾人看應惜春光此夜難何
處忽然羌管急吹落空庭素影寒

林衣集

卷六

二四明叢書

約園刊本

馬上見

錦鞦玉鐙送春妍暗拂香風逗早蓮隄柳欲舒分翠黛
林鶯不語學花鈿驅車漫道逢魚嶺作賦應須繼洛川
可柰長途回首處無情最是隔籬煙

送無相上人歸越聞其淨廬近若耶溪戲有此贈
歸去香臺越水涯芡蘿小徑入煙霞三車幻出采蓮曲
百衲同觀浣女紗片片白雲迎棹遠森森修竹到窗斜
已知行腳遊應徧曾見維摩幾散花

喜範明偕令姪至

長榆正喜挹薰風遠道攜琴自海東
柏寺乍看雙壁合
竹林更羨一樽同
登臨月映高臺迴
指顧天連絕塞雄
聞說囊餘黃石祕
可能飛屑慰飄蓬

石榴

昔傳佳樹自塗林
移向園亭樾蔭深
豔發珊瑚爭日麗
苞含火齊傲霜侵
漫誇文杏迎春早
應笑來禽共水沈
輝映環臺堪作賦
君家原是孟陽心

桃花

穠華灼灼鬪紅芳
細雨窗前裊豔妝
春滿長榆初散錦
枝分上苑欲生香
乍疑溪洞浮漁艇
還想瓊臺醉羽觴
知是東君加護惜
莫將移向歷陽傍

初歲晚眺

高臺縹緲意何之
滿目蕭條隔歲期
乍拂春風寒未破
幾懷明月影初窺
他鄉對酒愁偏入
故國緘書望轉遲
欲慰相思無處所
可堪敲枕獨醒時

獨坐湖亭待酒不至

炎夏尋芳向碧湖
閒亭清興坐來孤
浮波菡萏香疑蕪
疊嶂煙嵐翠作圖
漫折芳口聊自賞
獨憐啼鳥爲誰呼

回看兩岸垂綸者竟日臨淵定有無

夏日臧拔翁移樽東湖邀同寅諸友賞荷卽賦

香風拂拂漾漣漪
載酒應須勝習池
朱景青蓮薰苜蓿
異鄉同調愜墟簾
傾卮幾借山陰墅
濡髮渾忘白接羅
無那村前煙霧暝
欲尋歸路惜分攜

夏閨情

寂寞從前久非關
此日長已惜芳菲
去何用芟荷香憎
鶯語深樹妬燕乳
雕梁空懸消暑珠
焦心轉自傷半捲
流黃篋淒切不堪涼
不信朱景心顛倒
誤陰陽聞說玉
關冷未秋先隕霜
慙勤謝青女相爲貸
戎行

感懷

青山意自淡白雲非所營
九衢敝輪鞅雨雪催逢迎
羈寂旣已異得喪由我情
何必悔讀書誤人逐浮名
何必仇時命牢落此生平
欲存達者心試看鴻冥冥

見雁

朔風何凜烈吹此征雁飛
矯然刷羽翰雲路渺何期
何必華堂燕去去還復往
別有羣飛槍時則旋控地
漫言知此遊亦各從所志

雜詩六首

鮮雲出高岑幽泉鳴澗底兩者亦何心升沈若有以山
居翫物化氣運誰能擬持此問解人定云有真理

涉世鮮歡悵遠俗生孤慮辭喧愜我情尋幽得所據自
古有達人皆以誇獨豫茫茫宇宙寬安知孰來去閒雲
日悠悠終亦何所與

桂父凌紫煙丹經啓神祕仙蹤信可尋洞冥由早智誰
令骯髒骨結束牢騷意渺渺三山芝雄主暮來覬爾欲
餐朝霞亟挽青陽轡

林衣集

卷六

五四明叢書

約園刊本

開山延白雲鑿石注通川妙得幽棲趣巧結煙霞綠空
山從古來往往住神仙亦有秦人洞深居忘歲年試問
山水意豈求人剔穿所以有真隱買山亦徒然

有鳥翩翩起一去無停翼寧辭霜露零但信長風力匪
爲稻梁思豈從雁鷺息偶爾憩空山一望煙雲黑未知
寥廓心于何有所極

七雄收奇策鷲鷲儀與秦炎精折羣力錚錚張與陳未
酬時主願鬪爭已狷狷還想生平意相棄如飛塵世人
重契誼慷慨薄秋冥慎勿趨羶途金石仍可論

秋夜

秋色何來早蕭疏幾雁羣邊聲杯底落空緒鏡中分亂
葉依窗響長河淺白雲書生無限意翫麟欲從軍

花別語

已悵芳辰去寧忘欣賞心香憐題句雋影寄酒卮深搖
曳從風妬低徊待月臨與君邀淑景次第許相尋

燕別語

豈能辭大廈無件盡清秋絮語猶難竟低飛幾欲留將
雛同漠漠羨雁轉悠悠不是驚嚴節惟應春盡遊

林衣集

卷六

六四明叢書

約園刊本

覽鏡

幾度看明月頻逢白雲飛客懷空自遠愁鬢不知輝今
日參差見還疑是也非

大隄女

芳鬢照綠波繡袂嬌初柳香風盡日吹不出大隄口莫
是有遊人乞得明珠否

襄陽曲三首

漢渚悠悠煙水迷萬山潭影日初低近得春遊女兒伴
新聲翻盡白銅鞮

青樓如綺酒如餉簇簇千帆未解維笙歌到處留人醉
猶說當年倒接籬

郡城南望峴山尊蕪沒殘碑掩淚痕行人來往頻相問
何處煙霞是鹿門

江南曲

江上風高花亂飛飛花逐鳥送春歸蜂尋香氣撲人衣
幽思結繞羅幃誰能對落暉

閨怨二首

獨上高樓悲遠天又看飛絮逐飛煙邊庭應是無楊柳

林衣集

卷六

七四明叢書

約園刊本

不識春光更一年

門前芳草厭秋霜望斷南來是雁行到底期君一相見
還時定覓月支香

歸雁四首

東風迢遞半春陽碧落題來復幾行聽得天南聲斷續
不教孤客住他鄉

煙棲水宿自青秋好趁光風謝客遊矯翼不辭逢海闊
呼羣豈羨麥畦稠

相從雲侶去無涯一片歸心對日華別後寂寥空鷺渚

望中縹緲見龍沙

飛向榆關整復斜
數聲嘹唳應胡笳
恰遇燕來還共語
不知消息寄誰家

石上松過僧舍偶題

聞說深公不買山
故將拳石伴經閒
栽松不是資談柄
記取西來幾日還

江干曲

送郎江上一孤舟
夢見舟行天際頭
安得西風吹夢去
與郎相並泊汀洲

林衣集

卷六

八四明叢書

約園刊本

怨歌

妾心如孤鐙
暗中光更徹
君心如層冰
日中不可熱
不恨有心今是冰
只恐冰寒處處凝

讀陳木叔紅樹詩漫題四絕

誰從素景逞朱顏
那得深林醉玉環
扶荔浦邊春望斷
焉支山下晚來還

一片霞光萬葉鮮
都緣青女曉妝妍
爲牽騷苑淋漓興
不受深宮寂寞憐

丹崖璫樹不知秋
春色殷然豔客眸
登臨莫漫愁沽酒

勝有林端琥珀浮

蕭蕭楓葉小山寒恍似中傳赤玉盤此日繽紛題彩筆
應作洞雲禁裏看

菊花

名園綺閣帝城隈曲徑寒花處處栽爲愛晚香登月榭
故移春酒近霜臺高秋鴻雁從風度遠口菰蘆卽境開
莫向口驄口御李且淹車馬罄深杯

林衣集

卷六

九

四明叢書
約園刊本

林衣集卷六

先生時有撰著輒削其藁或甫就簡人又取去無一存者蓋非徒金子樓之三焚唐球之燃稿納大瓢已也所幸博雅好文之士競相傳寫猶有兼本傳在菽苑中耳不肖曩弟俱辱在弟子之籍而元仲得侍先生爲日更長每當講誦之暇購募散逸撫表興思因爲文以徵之自邇及遠徧探冥搜凡耳之所聞目之所見隨手鈔錄八年於茲裁得十之四三而已且其閒朽編脫簡闕略彌多帝虎陶陰躡誤殊甚元仲復爲刊定眞僞手自排纘繕寫以呈先生先生更復刪除其半僅取林衣名集志謙也不肖曩弟相與糾工付梓覆校者七閱月者四始告成事待歲之更始求敘於本寧李先生眉公陳先生見可徐先生仲舉錢先生與吾師武林黃先生而後懸諸國門其它詩賦尺牘副在名山者尙俟異時補輯彙爲全編若夫斂衽贊述則具家世父敘中仲也不敏蓋不能贊一辭云門人馮元仲頓首百拜識